

LE BULU'Ë LAHUI DIOS ATI' NUZUJË' LU GUICH SAN JUAN

Le bulu'ë lahui Dios ca
nac queë' Jesucristo

1 Lë ni nac tu le bulu'ë lahui Jesucristo, le bë'ë Lë' latj Dios ului'inë' yugu' huen dxin queë' ca nac le run bayúdx lactë. Jesucristo bsölë'ë tuë' gbaz la'y queë', nu na' buzejni'i neda', Juan, huen dxin queë' Cristo. Gbaz la'y na' bului'inë' neda' ca nac lë ni. ²Neda', Juan, ruzuja' lu guich ni le nac gdutë li ca nac yúgu'të le blé'ida', len runa' lna' lau qui xtidzë'ë Dios len qui le benë' lna' lau Jesucristo.

³Bica' ba nu uláb didza' ni, len bica' bagac nup luzé naggac nu na' uláb xtidzë'ë Dios ni, len lun ca rna lë ni nayúj lu guich, le chzoa lac.

**Juan ruzujë' lu guich le uzejni'i
gadx cõ' bunách queë' Cristo**

⁴Neda', Juan, ruzuja' lu guich didza' uzejni'i gadx cõ' bunách queë' Cristo, nacuá' luyú Asia. Dios, Nu zoacz, len gzoatecz, len ral-la' guid, rnabda'-në' uzá' ladxë'ë queë'li, len gunë' ga soa dxi icj ládxi'dau'li, dzaggac Lë' gadx bö' nacuá' lahuë' Lë' ga ni' rō'ë rna bë'ë. ⁵Dzaguë' ca' Lë' Jesucristo,

runë' ca rnë' len runë' lna' lau queë' Dios. Zi'al Lë' bubanë' tsaz lu yöl-la' gut, len rna bé'inë' bönni' ta'ná bë'ë yödzlyú ni. Lë' nadxi'inë' rë'u len gdibë' rë'u, bugüë' dul-la' nabága'ru' len xchönë' bulaljë' lë'i yag cruz, le gutië' uláz queëru'. ⁶Jesucristo benë' ga rna bë'ru' len ga nacru' bxuz, quië cu'ru'-në' yöl-la' ba Dios, Xuzë' Jesús. Yöl-la' ba Lë' len gactecz queë' yöl-la' uná bë'. Ca' gac.

⁷Gul-yutsca'. Zë'ë Cristo lu böaj luzxbá. La'le'i Lë' yúgu'të bunách lenca' nup ni' glun Lë' huë', guludöddë' Lë'. La'bódx yechi' yúgu'të bunách yödzlyú ni cati' la'le'i Lë'. La'naru' gactë cni. Ca' gac.

⁸Cni rnë' Lë': "Neda' naca' Nu zoa zi'al lenca' Nu rajseytë ca nac le rzu lau len le ruúdxte." Cni rnë' Xanru', napczë' yöl-la' huac. Zoaczë' Lë', len gzoateczë', len zi'a guidë'.

**Rlé'inë' Juan yöl-la' yení'
queë' Jesucristo**

⁹Neda', Juan, naca' böchi' lza'li' len tsazxón rzaca' rguí'lena' lbi'ili', len tsazxón len lbi'ili' ruzi'a xbey le rna bë'ë Dios, len nadél-li'da' yöl-la'

rböz zxön ladxi' na' runnë' queëru' Jesucristo. Gatsj lahui'l nis zxön nadzuna' tu luyú bidx ni, nazi' lei Patmos. Nadzuna' le bena' Iban qui xtidzë'è Dios len le bena' Ina' lau queë' Jesucristo. ¹⁰Lu dza la'y queë' Xanru', gdu gzóalenë' neda' Dios Bö' La'y, ati' byönda' cúdzu'la' chi'è bönni' rulidzë' zidzj. Byön chi'è ca rbödx trompeta. ¹¹Bönni' ni gudxë' neda': "Neda' naca' Nu zoa zi'al len Nu rajseytë ca nac le rzu lau len le ruúdxhtë. Bzuj lu guich le rlé'inu' len bsöla' lei quegac gadx cö' bunách quia', nacua' luyú Asia, nup nacua' lu yödZ Éfeso, len lu yödZ Esmirna, len lu yödZ Pérgamo, len lu yödZ Tiatira, len lu yödZ Sardis, len lu yödZ Filadelfia, len lu yödZ Laodicea."

¹²Bueycja' quië glé'ida' nuzxa na' rulídz neda'. Cati' bueycja', blé'ida' gadx le nua'gac gui' náquicni oro. ¹³Ladj gadx le nua'gac gui' na' blé'ida' tu Nu nalá' ca rnë'è bönni'. Nacuë' tu lari' tunn le rdxin xni'è, len lchu'è nasíë' tu pan náquini oro. ¹⁴Chguichdau'z nac guitsa' icjë' ca nac zxila' o ca rna' bögui', ati' ryëp yös yení' yöj lahuë' ca gui'. ¹⁵Ryëp yös yení' ni'è ca guia bronce dxildau', le nudzé'itsca lu gui' ca bau' yal. Zidzj byön chi'è ca ryön tu yegu zxön. ¹⁶Lu në'è yubél zxoacba' gadx bölj yení', ati' ru'è r-ruj didza' le nac ca tu guia tuchi' natuchi' grop rui'i. Ryëp yös yení' lahuë' ca gbidz cati' rudzá'a.

¹⁷Cati' blé'ida' Lë' gdzö'a xni'è ca bönni' nat. Ni'r Lë' bxoa në'è neda' len në'è yubél len gudxë'

neda': "Cutu gádxinu'. Neda' naca' Nu zoa zi'al len Nu rajseytë. ¹⁸Naca' Nu nabáncz. Gutia', ati' na'a zóatecza' nabana'. Dë lu na'a gna bé'ida' yöl-la' gut len latj quegac nup natgac. ¹⁹Bzuj lu guich lë na' chblé'inu', len le rac na'a, lenca' le ral-la' gac töd na'a. ²⁰Lë ni nac le nagachi' ca nac quecba' gadx bölj yení' na' blé'inu' zxoacba' lu na'a yubél, len ca nac gadx le nua'gac gui' náquicni oro. Gadx bölj yení' na' naccba' le run lsaqui' qui gadx gbaz quegac gadx cö' bunách quia', ati' gadx le nua'gac gui' na' nacgac le run lsaqui' quegac gadx cö' bunách quia' na'."

Didza' bsölë'è yödZ Éfeso

2 Gnë' ca' Bönni' na': "Bzuj lu guich didza' ni gsölu'u queë' gbaz quia' zóalenë' bunách quia' lu yödZ Éfeso. Cni uzuju' lu guich: Rui' didza' Nu na' zxoacba' lu në'i yubél gadx bölj yení', len rda gatsj lahui'l gadx le nua'gac gui' na' náquicni oro. ²Cni rna: Neda' nözda' yugu' le runli' len ca rúntscali' dxin. Nözda' rbözli' zxön ladxi' len cutu gac gua' glenli' nup tua' dö'. Nözda' chgzxi' bëlli' nup ta'ná nacgac gbaz quia' san cutu ca' nacquë', ati' na'a nózili' ta'zí' yë'è. ³Rbözli' zxön ladxi' len chgzxaca' gd'i'li' le da'li' neda', san cutu bcuidi' ládxi'li'. ⁴Na'a, dë tu le ruquí lbi'ili': Cutur nadxi'ili' neda' ca na' bdxli'ili' neda' zi'al. ⁵Qui lë ni na', gul-tsjajnéy ca na' benli' zi'al, lë na' busanli', ati' na'a, gul-bí'i ládxi'li' len gul-gún ca na' benli' zi'al. Chqui' cutu ubí'i ládxi'li', guidtea' queëli', ati' ugúa' xlatj le nua' gui' queëli'. ⁶Na'a, zoa tu le

raclen lbi'ili'. Cutu rlé'ili' dxi'a le tuné' bönni' nicolaíta, nup na' ta'yíj ládxi'gac bdau' guiöj bdau' yag len tun le cunác, lè na' curlé'ida' dxi'a ca' neda'. ⁷Nu ryöni ral-la' uzé nag lè ni rné' Dios Bö' La'y, ruí'lené' didza' yugu' cö' bunách quia' neda', Cristo, rné': Nup luxícj lu le rac yödzyú, guna' ga lagu le rbia yag zoa gatsj lahui'l la' yël lach queé' Dios, le gun ga la'cuá' tsalzú."

Didza' bsölë'ë yödzy Esmirna

⁸Gnè' ca': "Lèzca' cni, bzuj lu guich didza' ni gsölu'u queé' gbaz quia' zóalené' bunách quia' lu yödzy Esmirna. Cni uzuju' lu guich: Rui' didza' Nu na' zoa zi'al len nac ca' Nu rajseytè, Nu na' gut len bubán tsaz. ⁹Cni rna: Neda' nözda' le runli' len ca' rzaca' rguí'li'. Nözda' nacli' yechi' san le nactè rlé'ili' yöl-la' tsahui' le nac gdu. Nözda' ca' ca' ta'né' xöhui' queéli' nup ni' ta'ná nacgac bunách judío, san cutu ca' nacgac cni. Nup ni ta'dá' Satanás, tu' xöhui'. ¹⁰Cutu ca' gádxili' le ral-la' saca' qui'li'. Tu' xöhui' na' gun ga gdzunli' lidx guia la'li' lbi'ili'. Cni si' bè' lbi'ili', ati' gdu ca' chi dza saca' qui'li'. Gul-tsejlè' neda' ga gdxintè dza gatli', ati' neda' gunna' queéli' yöl-la' na'bán gdu. ¹¹Nu ryöni ral-la' uzé nag lè ni rné' Dios Bö' La'y, ruí'lené' didza' yugu' cö' bunách quia' neda', Cristo, rné': Nup luxícj lu le rac yödzyú, cutu bi gun quegac yöl-la' gut le gac burópl quegac nup la'cua'tecz lu gui' gabí'."

Didza' bsölë'ë yödzy Pérgamo

¹²Gnè' ca': "Lèzca' cni bzuj lu guich didza' ni gsölu'u queé' gbaz

quia' zóalené' bunách quia' lu yödzy Pérgamo. Cni uzuju' lu guich: Rui' didza' Nu na' nua' guia tuchi' na' natuchi' grop rui'i. ¹³Neda' nözda' le runli'. Nözda' ca' zoali' ga ni' rna bè' Satanás, tu' xöhui', san ni ruzxöni ládxi'li' neda'. Cutu ca' nusanli' ca' réjlè'li' neda', cutu busanli' lei yugu' dza ni' cati' guludöddé' ga zoali' Antipas, bönni' ni' bénteczé' lna' lau quia', ati' gutiè' ga ni' zoa Satanás, tu' xöhui'. ¹⁴Na'a, dè tu chop le tu'quí lbi'ili': Nacua'len lbi'ili' lu yödzy Pérgamo la'gac bunách nazí' lu na'gac zxba queé' Balaam, bönni' ni' busèdnè' Balac gunè' ga la'chixi la'nigui bunách Israel, glahué'-ba' yugu' böa' bédxdau' guludöcdé'-ba' laugac bdau' guiöj bdau' yag len glunè' le cunác. ¹⁵Lèzca' cni nacua'len lbi'ili' nup ni' nazí' lu na'gac zxba quegac bunách nicolaíta, lè na' curlé'ida' dxi'a neda'. ¹⁶Qui lè ni na', gul-bí'i ládxi'li' na'a. Chqui' cutu ubí'i ládxi'li', guidtea' ga zoali' len tíl-lena' lequè' len didza' r-ruj ru'a, le nac ca' tu' guia tuchi'. ¹⁷Nu ryöni ral-la' uzé nag lè ni rné' Dios Bö' La'y, ruí'lené' didza' yugu' cö' bunách quia' neda', Cristo, rné': Nup luxícj lu le rac yödzyú, guna' ga lagu yöt maná na' nagachí'. Unödzya' ca' quequè' tu' guiöj chguichdau', ati' lu guiöj na' nayúj tu' la' cub, nutu nu nunbè' lei, san nupz na' la'zí' lei, lumbè' la' na'."

Didza' bsölë'ë yödzy Tiatira

¹⁸Gnè' ca': "Lèzca' cni, bzuj lu guich didza' ni gsölu'u queé' gbaz quia' zóalené' bunách quia' lu yödzy Tiatira. Cni uzuju' lu guich: Ru'è

didza' Zxi'në' Dios, Nu na' dxia yôj lahuë' nacgac ca gui', ati' ni'ë nacgac ca guia bronze dxildau'.¹⁹ Cni rnë': Neda' nözda' le runli'. Nözda' ca nadxi'ili' neda' len ca réjlë'li' neda'. Nözda' ca' ca runli' xchina' lu yöl-la' rböz zxön ladxi' queëli'. Nözda' nacr gdu ca runli' yugu' lë ni ca benli' zí'atël.²⁰ Nacuá' tu chop le tu'quí lbi'ili': Rui'li'-nu latj ngul na' lënu Jezabel, rnanu rui'nu didza' uláz queë' Dios, ati' ni'a qui le rusédinu rzi' yé'ínu nup tun xchina'. Rusédinu lequë' le run ga tunë' le cunác len tahuë'-ba' böa' bëdxdau' ta'gu'ë-ba' laugac bdau' guiöj bdau' yag.²¹ Neda' bë'a-nu latj ubí'i ládxi'nu, san cutu ré'ninu uca'nnu le cunác na' runnu.²² Qui lë ni na' chu'na'-nu tu le gáti'nu ga na' saca' qui'nu lu xhuë'nu tsaxxón len nup glun tsaxxón len lënu le cunác. Cni guna' na'a chqui' cutu lubí'i ládxi'gac quië cutur lun dul-la' na'.²³ Guna' ga latbi' zxi'nnu. Cni gac, láquibe'i yúgu'të cö' bunách quia' ruyúa' le ta'bequi icjgac len le ta'zá' ládxi'gac bunách, ati' ubi'a queëli' tsca nac le runli'.²⁴ Yezíca'li' zoali' yödZ Tiatira, nul-li' cunazí' lu na'li' lë na' rusédinu, len cutu nazëdli' lë na' ta'ná bunách ni' nac le nayéjni'tsqui, san le nactë naqui qui Satanás, tu' xöhui', rëpa' lbi'ili': Cutu uspaga'a lbi'ili' yetú le ral-la' gunli'.²⁵ Na'a, lë na' chnazí' lu na'li', gul-gún chí'i ga gdxintë dza huöda'.²⁶ Bönni' ni' luxicjë' lu le rac yödZlyú len lunë' ca rë'nda' neda' ga udxte, neda' guna' ga la'ná bé'inë' bunách gdu'të yödZlyú.²⁷ Ca na' budödë' lu na'a Xuza' Dios yöl-la' uná bë', neda' ca' guna' ga la'ná

bé'inë' yugu' yödZ, gata' lu na'quë' xuyág guia, ati' luzxuxzjë' bunách na' ca nu ruxxúxj tu yusu' náquini yu.²⁸ Gu'a ca' quequë' bölj usí. ²⁹Nu ryöni ral-la' uzé nag lë ni rnë' Dios Bö' La'y, ruí'lenë' didza' yugu' cö' bunách quia' neda', Cristo."

Didza' bsölë'ë yödZ Sardis

3 Gnë' ca': "Lëzca' cni bzuj lu guich didza' ni gsölu' queë' gbaz quia' zóalenë' bunách quia' lu yödZ Sardis. Cni uzuju' lu guich: Rui' didza' Nu na' nacua'len Lei gadx bö' na' len zxoacba' lu në'i yubél gadx bölj yení, rna cni: Neda' nözda' le cunác runli', len nözda' chnatczli' zal-la' taqui bunách nabanli'.² Gul-spán ládxi'li'. Gul-gún tsutsu le nacua'len lbi'ili', le chzoa lat, le ráquibe'ida' cutu nac gdu lahuë' Dios le runli'.³ Gul-tsajnéy na'a zxba na' byönili' le gzxi' lu na'li'. Gul-gún ca rna xtidzë'ë Dios len gul-bí'i ládxi'li'. Chqui' cutu uspán ládxi'li', guida' ga zoali' tu tsalz ca na' rdxinë' tu tsalz gban, ati' cutu gnözili' bizxa dza na' guida' ga zoali'.⁴ Nacua'len lbi'ili' lu yödZ Sardis la'gac bunách cutu nacgac xöhui'. La'dalen neda' nup ni, nácugac lari' chguichdau'z le ruluí' nuhuöacquë' gdu dxi'a, le nacquë' lsaca' gac cni quequë'.⁵ Nup luxicj lu le rac yödZlyú ugacua' lequë' lari' chguichdau'z, len cutu usula' laquë' chnayujgac lu guich ga nayujgac lagac nup nadél-li'gac yöl-la' na'bán gdu. Si' lu na'a nup ni lahuë' Xuza' Dios lenca' lauquë' gbaz la'y queë'.⁶ Nu ryöni ral-la' uzé nag lë ni rnë' Dios Bö' La'y, ruí'lenë' didza' yugu' cö' bunách quia' neda', Cristo."

Didza' bsölë'ë yödZ Filadelfia

⁷Gnë' ca': "Lëzca' cni bzuju lu guich didza' ni gsölu'u queë' gbaz quia' zóalenë' bunách quia' lu yödZ Filadelfia. Cni uzuju' lu guich: Rui' didza' Nu na' nac la'y len rui' didza' gdutë li, len dë lu në'i xzi'n guia queë' David, bönni' gna bë'ë, Nu rsalj ga nu ryaz ati' nutu nu gac uséy' lei, len ruséy' ga nu ryaz ati' nutu nu gac gsalj lei. ⁸Nu ni rna: Neda' nözda' le runli'. Nözda' napli' lati'z yöl-la' huac, san runli' ca rna xtidza'a len cutu rutui'li' rnali' náquili' quia'. Qui lë ni na' nuzóa' lauli' tu ga nu tsaz le nayálj ati' nutu nu gac uséy' lei. ⁹Gul-yutsca', nup ni' ta'dá' Satanás, tu' xöhui', len ta'zí' yë', ta'ná nacgac bunách judío ta'yíj ládxi'gac Dios, san cutu nacgac cni, neda' guna' ga la'dxinë' lauli' len luzechu zxi'buqë' xni'ali'. Ni'r láquibe'inë' nadxi'ida' lbi'ili'. ¹⁰Le benli' ca rna xtidza'a, glözli' zxön ládxi', neda' gun chi'a lbi'ili' dza na' la'zaca' la'guí'i yúgu'të bunách yödZlyú ni, lë na' gac quië si' bë' nup nacuá' yödZlyú ni. ¹¹Zi'a guida'. Qui lë ni na' gul-gún chi'i le napli', cui gac nu gun ga cusi'li' lë na' ral-la' gunna' queëli'. ¹²Nul-li' ni' uxiejli' lu le rac yödZlyú, neda' guna' ga gacli' tsutsu ca nacgac yzxön, soali' gdau' ga na' zoë' Dios, len gatga grujli' ni'. Udá'a lbi'ili' ca lë' Dios quia', lenca' ca lë yödZ queë' Dios le nac Jerusalén cub, le ruhuótj r-ruj yehua' yubá lu në'ë Dios. Lëzca' udá'a lbi'ili' la' cub. ¹³Nu ryöni ral-la' uzé' nag lë ni rnë' Dios Bö' La'y, ruí'lenë' didza' yugu' cö' bunách quia' neda', Cristo."

Didza' bsölë'ë yödZ Laodicea

¹⁴Gnë' ca': "Lëzca' cni bzuju lu guich didza' ni gsölu'u queë' gbaz quia' zóalenë' bunách quia' lu yödZ Laodicea. Cni uzuju' lu guich: Rui' didza' Nu na' zoa tsaz, Nu run ca rna, len rui' didza' gdutë li ca na' run lna' lau, len nac ca' Nu na' blen lu në'i yúgu'të le benë' Dios. ¹⁵Cni rna: Neda' nözda' le runli'. Ca runli' nac ca nis cunác ziaq, cutu ruca'nli' tsaz neda', len cutu nac ca nis zögui', cutu runli' xchina' gdu ládxi'li'. Dxi'ar gac la' gacli' ca nis ziaq o ca nis zögui'. ¹⁶Na'a, le nacli' ca nis nagúlz, len cunacli' ca nis ziaq, len cutu nacli' ca nis zögui', chu'na' lbi'ili' ca run nu huëb nis nagúlz na'. ¹⁷Lbi'ili' rnali' rlë'ili' yöl-la' tsahui' queëli' len rac dxi'a queëli', len cutu bi ryadzj queëli', san cutu ráquibe'ili' le nacli'. Bayechi' nacli'. Nacli' xzi'. Nacli' yechi', len nacli' lau chul len rdali' xguidz. ¹⁸Qui lë ni na', neda' ruzéjni'da' lbi'ili' gá'uli' lu na'a neda' le nac ca oro le nuna' dxi'a lu gui', quië gata' queëli' yöl-la' tsahui' gdu. Ral-la' gá'uli' ca' quia' lari' chguich gáculi', quië ggachi' yöl-la' xguidz queëli' le run ga nu rutuí'i. Ral-la' gá'uli' ca' quia' le gun ga luhuóac yöj lauli' quië gac glë'ili'. ¹⁹Neda' ruzeyda' bach len rut rguina' yúgu'të nup nadxi'ida' chqui' cutu tun le nac dxi'a. Qui lë ni na', gul-bí'i ládxi'li', gunli' xchina' gdu ládxi'li'. ²⁰Gul-yutsca', néda'cza' zoa' ga nu ryaz, rulidza'. Chqui' núti'tëz nu yöni chi'a len gsalj quia', tsazia' len gágulena' nu na', ati' gágulen neda' nu

na'. ²¹Nul-li' ni' uxicjli' lu le rac yödzyú, neda' guna' ga có'lenli' neda' tsaxón ga na' rō'a rna bē'a, ca na' benē' ca' quia' neda' Xuza', buxicja' neda' lu le guc quia', ati' gró'lēna'-nē' tsaxón Xuza' ga na' rō'ē rna bē'ē Lē'. ²²Nu ryōni, ral-la' uzé nag lē ni rnē' Dios Bō' La'y, ruí'lenē' didza' yugu' cō' bunách quia' neda', Cristo."

Yöl-la' ba ta'gu'ē Dios yehua' yubá

4 Gdöd glac lē ni, buyúa' len blé'ida' tu ga nu riaz nayájl yehua' yubá. Byōnda' ca' chi'ē bōnni' na' byōnda' zi'al, bulíd zidzj ca rbōdx trompeta. Chi'i ni bulíd neda', gna: "Gda xtsa'l ni ati' neda' ului'ida' li' le run bayúdx lac tōd ni."

²La' ni'z gzóalenē' neda' Dios Bō' La'y, ati' blé'ida' ni' yehua' yubá tu latj ga Nu rō' rna bē', len blé'ida' ca' Nu na' rō' latj na'. ³Ryēp yōs yení' Nu na' rō' latj na', ca na' ryēp yōs yení' guiōj jaspe len guiōj cornalina, yugu' guiōj záqui'tsqui. Gatsj lahui'll latj na' zoa bquita' nac lach ca nac guiōj esmeralda, le ryēptsca yōs yení'. ⁴Gdu zbi'il latj na' nacuá' ca' yetáp uruá' latj gap ta'bó' nup ta'ná bē', ati' yugu' latj na' rō'quē' tap uru'ē bōnni' gul, nácuquē' lari' chguichdau'z, len dxiagac icjquē' bregui' náquicni oro. ⁵Latj blau ga ni' rō' Nu na', ta'rúj yōs len gziu' rnē, ati' bō zōn ryu'u. Lahui' lau latj na' tu'zení' gadx le ta'gú'u yení', le nacgac gadx bō' dzaggac Dios. ⁶Ca dōdl lahui latj ni dē tu ca nac tu nis zōn ryēp yōs yení' ca guiōj jar.

Gdu zbi'il latj na', tsla'a hueaj nacuá' tap nup nabangac, ati' zian

yōj laugac dxiagac zaca' cúdzi'lgac len láhuilgac. ⁷Tu nu nutsa' ladj tap ni nalá' ca nacba' bēdx guixi'. Nu na' buróp nalá' ca nacba' bēdx, ati' nu na' bunn nalá' lahui ca nac lau bōnni', ati' nu budáp nalá' ca nacba' bsia' rzuba'. ⁸Idaptē nup ni, qui queēgac dxia xop xilgac, ati' láhuilgac len lé'ilgac, yōj lau zian dxiagac. Rēl len tē dza cutu ca' tu'sán, ta'ná: "La'y, la'y, la'y naquē' Xanru' Dios, napczē' yöl-la' huac. Gzoaczē' Lē', len zoaczē', len chzoa guidczē'."

⁹Nup na' nabangac ta'gú'u yöl-la' ba Nu na' rō' rna bē', len zoatecz nabán. Tun ba la'n Nu na' len tē Nu na': "Xclenu'." Bátti'tēz tun cni idáp na', ¹⁰tu'tság lauquē' lyu lahui' lau Nu na' tap uru'ē bōnni' gul na', ta'yj lādxi'quē' Nu na' zoatecz, len tu'cu'ē bregui' oro quequē' lahui' lau latj ga ni' rō' rna bē' Nu na', ta'né':

¹¹Xantu' Dios, nacu' lsaca' Cu'tu' Li' yöl-la' ba, Len guntu' Li' ba la'n, Len gata' quiu' yöl-la' uná bē' Le benu' yúgu'tē le dē. Ca rē'ncznu' nacuá' len gulazú lau nacuá'.

Tu guich len Bōnni' naquē' Bō'cu' Zxíla'dau'

5 Ni'r blé'ida' tu guich lu na' yubél Nu na' rō' latj blau. Guich na' nac tu guich nudúb, len da' didza' lē'il len lahuil. Naguel-la' guich na' gadx le nuseyjgac lei. ²Blé'ida'-nē' tuē' gbaz la'y blau, ati' bē'ē zidzj didza', gnē': "¿Nuzxa nac lsaca' uladzu' le naguél-la'gac guich ni len gsalj lei?"

³Nutu nu guc gsalj guich na' len cutu guc nu uyú lei, nitú nu zoa yehua' yubá, len nitú nu zoa luyú, len nitú nu zoa zxanil luyú. ⁴Ni'r grödxá' le cutu bdzöli nu nac lsaca' gsalj guich na', len cutu bdzöli nu nac lsaca' uláb lei, len nutu nu nac lsaca' uyú lei. ⁵Ni'r gudxë' neda' tuë' bönni' gul ni', gnë': "Cutu cödxu'. Nu na' nac ca bëdx guixi', Nu nabablen zxi'n xsoë' Judá, len nac ca' zxi'n xsoë' David, chbuxícj lu yúgu'të le rac, len saqui' uladzu' le naguél-la'gac guich ni len gsalj lei."

⁶Ni'r blé'ida'-në' Bönni' naquë' Bö'cu' Zxíla'dau', zuinë' lahui' lau latj blau na' zoa gatsj lahui'l nup na' nabangac len gatsj láhui'lë' ca' bönni' gul na'. Naquë' huë' ca nac qui bö'cu' zxila' zoa nu budödi lëba', nacuá' gadx luzba' len gadx yöj lauba', le tu'luí' ca nacgac gadx bö' na' dzaggac Dios, nasölë'ë leygac gdu'të yödzlyú. ⁷Gdödë' Bönni' naquë' Bö'cu' Zxíla'dau' len gdel-lë'ë guich na' lu na' yubél Nu na' rö' latj blau na'. ⁸Cati' chgdel-lë'ë guich na', guluzechu zxibquë' lahuë' Bönni' na' naquë' Bö'cu' Zxíla'dau' idáp nup na' nabangac len idáp uru'ë bönni' gul na'. Zönquë' le rul-l nazí' lei arpa tu tuë' bönni' gul na', len nua'quë' ca' yugu' bdxí' náquicni oro, yúdzugac yal, lë na' rulú' yöl-la' rulídz Dios quegac bunách queë'. ⁹Tul-lë' tu le rul-l yöl-la' ba, le nac cub, le rna cni:

Nacu' lsaca' quel-lu'u guich
 Len uladzu'u le naguél-la'gac lei
 Le bë'u latj bönni' guludöddë'
 Li',

Ati' len xchönu' böa'uu' bunách
 quië laqui queë' Dios,
 Nacgac bunách gza'a nacuá'
 gdu'të yödzlyú,
 Bunách tui' yúgu'të didza' yubl,
 Len nababgac yúgu'të yödz len
 yúgu'të luyú nacuá' gdu'të
 yödzlyú.

¹⁰Benu' ga nacquë' bönni' uná bë'
 Len ga nacquë' bxuz queë' Dios
 queëru'.
 Benu' ga ta'ná bë'ë yödzlyú.

¹¹Ni'r buyúa' len byönda' chi'iquë'
 zian gbaz la'y. Gayuá' len gayuá'
 nacu'ë. Nacu'ë gdu zbi'il latj blau na'
 tsaxxón len nup na' nabangac lenca'
 len yugu' bönni' gul na'. ¹²Tu'ë
 zidzj didza' yúgu'të, ta'në':

Bönni' na' naquë' Bö'cu'
 Zxíla'dau', guludöddë'-ba',
 Naquë' lsaca' gata' lu në'ë yöl-la'
 uná bë'
 Len yöl-la' tsahui'
 Len yöl-la' rejni'i
 Len yöl-la' huac.
 Naquë' lsaca' gunru'-në' ba la'n
 Len tsej láchxi'ru' Lë'
 Len cu'ru'-në' yöl-la' ba.

¹³Ni'r byönda' tul-l yúgu'të bi benë'
 Dios yehua' yubá len yödzlyú, len
 zxanil luyú len lu nis zxón. Tul-l
 yúgu'të bi nacuá' yugu' latj na', ta'ná:
 Yöl-la' ba Nu na' rö' latj blau,
 Lenca' Bönni' na' naquë' Bö'cu'
 Zxíla'dau'.

Gúnteczru'-në' ba la'n
 Len cú'teczru'-në' yöl-la' ba,
 Ati' gna bé'teczë' Lë'.

¹⁴Idaptë nup na' nabangac ta'ná:
 "Ca' gac."

Ni'r idáp uru'ë bönni' gul na'
 gulutság laquë' lyu len gulayj
 láchxi'quë' Nu na' zoatecz.

Le naguel-la'gac guich

6 Ni'r blé'ida'-nè' Bönni' naquë' Bö'cu' Zxíla'dau', buládzu'è tu le naguel-la' guich na', ati' byönda' tu nu nutsa' ladj idáp na' nabangac, ryön chi'i ca gziu' rnë, gna: “Gda uyú!”

²Buyúa', len blé'ida'-ba' tuba' böa' chguich, ati' zön tu uxiti' yag nu na' dxia lëba'. Glu'è lë' tu bregui' udxíë' icjé', ati' brujé' ca tu nu nactër blau quië uxicjé' lu gdil-l.

³Cati' buládzu'è le buróp le naguel-la' guich na', byönda' buróp nu na' nabán, gna: “Gda uyú!”

⁴Ni'r brujba' yetuba' böa', nacha' xna. Guludödë' lu në'i nu na' dxia lëba' yöl-la' huac uná bë' tsajtúë' yöl-la' rböz dxi'a tsáhui'dau' quegac bunách len gunë' ga ludöddë' lza'quë'. Gulunödzjé' queë' tu guia tuchi' zxön.

⁵Cati' buládzu'è le bunn le naguel-la' guich na', byönda' bunn nu na' nabán gna: “Gda uyú!”

Buyúa' len blé'ida'-ba' tuba' böa' gasj, ati' zön tu zxgonz nu na' dxia lëba'. ⁶Byönda' rui' didza' tu chi'i gatsj lahui'l tap na' nabangac, rna: “Chop guia zxoá' xtil lazxj qui tu dza huen dxin le gac gbin, len xop guía zxoá' cebada lazxj qui tu dza huen dxin, san cutu gunu' ga yadzj le nac za len cutu bi gunu' qui xisi uva nal.”

⁷Cati' buládzu'è le budáp le naguel-la' guich na', byönda' rui' didza' budáp nu na' nabán, gna: “Gda uyú!”

⁸Buyúa' len blé'ida'-ba' tuba' böa' gulj, ati' nazí' lei Yöl-la' Gut nu na' dxia lëba', ati' zeajlen lei nu nazí'

lei Latj Chul. Guludödë' lu në'i nu na' gna be'i gatsj tu gatsj bunách nacuá' yödzyú quië gdödi lequë' len guia tuchi', len ni'a qui yöl-la' rdun, len ni'a qui guidzhuë', len lu rú'acba' böa' guixi' snia' dzö'ba' yödzyú.

⁹Cati' buládzu'è le bugayu' le naguel-la' guich na', blé'ida' zxan bcugu yehua' yubá ni' bö' glacczë' bönni' ni' guludödcde' lequë' le glunë' lban qui xtizë'è Dios len le glunë' lna' lau queë'. ¹⁰Gluí' zidzj didza' yugu' bö' ni, gulaná: “Xantu' La'y, runu' ca rnau', ÷batxcz cuequi xbeynu' netu' len uzí' lau' bönni' ni' nacu'è yödzyú le guludöddë' netu'?”

¹¹Gulunödzjé' quequë' lari' chguichdau'z lacuë', len glë' lequë': “Ral-la' uzí' ládxi'li' yetú chi'idau'z, ga gdxinr dza la'dxín ni yúgu'të lza'li' huen dxin queë' Cristo, bönni' na' ral-la' ludödi ca' lequë' bunách ca na' guludödi lbi'ili'.”

¹²Cati' buládzu'è le buzxóp le naguel-la' guich na', buyúa' len blé'ida' gtittsca luyú. Böac gasj gbidz, guc ca tu lari' guitsa' gasj, ati' böac xna beo' ca nac rön.

¹³Gulaguíndj luyú bölj luzxbá, guc ca rac qui yag higo, ta'guíndj le rbia cati' rutá lei bö' bdunu'. ¹⁴Gdöd qui luzxbá, guc qui ca rac qui guich cati' nu rutúb lei. Guladzá' xlatjgac yúgu'të guí'adau' len yúgu'të gap zoa luyú bidx lu nis zxön. ¹⁵Ni'r gulucachi' lauquë' gap nac zxan bloj len gap nac lë'i guiöj guí'adau' bönni' ta'ná bë'è luyú, len yugu' bönni' blau, len bönni' ta'lé'inë' yöl-la' tsahui', len bönni' nacu'è lu na'quë' bönni' rjaquë' gdil-l, len

bönni' dë lu na'quë', len yúgu'të bönni' nadá'ugac, len yúgu'të bönni' cunadá'ugac. ¹⁶Glë' yugu' guí'adau' na' len yugu' lë'i guiöj na': "Gul-dubaga' netu', len gul-cachi' netu', cui gle'i netu' Nu na' rö' latj blau ni' len cui gdel-li' netu' yöl-la' rley queë' Bönni' na' naquë' Bö'cu' Zxíla'dau'. ¹⁷Chbdxin dza uluí' lahui yöl-la' rley quequë', ati' ñnuzxa caz saqui' gua' glen lei?"

Tu gayuá' yu tapún milë' bönni' da' tu le nac bë' ra' xgaquë'

7 Gdöd glac lë ni blé'ida' tap gbaz la'y zuicnë' idáp la'a yödzyú, tu'zaguë'ë xnözgac idáp bö' reycj tsla'a hueaj luyú, cui tseycj bö' yödzyú, len cui tseycj lu nis zxön, len cui utá yag. ²Blé'ida'-në' ca' yetúë' gbaz la'y zë'ë r-rujë' ga rlen gbidz, nu'ë tu le udé'ë le gac bë' nup nacgac queë' Dios ban. Bë'ë zidzj didza', bulidzë' idapë' gbaz la'y ni' nadód lu na'quë' yöl-la' huac uná bë' lun ditjnë' luyú len nis zxön. ³Gudxë' lequë': "Cutu gun ditjli' luyú len nis zxön len yugu' yag cati' uda'rtu' tu le gac bë' ra' xgaquë' bönni' huen dxin queë' Dios queëru'."

⁴Byönda' tsca nacquë' bönni' da' lequë' lë na' nac bë', nacquë' gdu tu gayuá' yu tapún milë' ladj yúgu'të cö' dí'a dza quegac xxi'n xsoë' Israel.

⁵Bönni' na' da' lequë' lë na' nac bë':

Xxi'n xsoë' Judá nacquë' chinnu milë'.

Xxi'n xsoë' Rubén nacquë' chinnu milë'.

Xxi'n xsoë' Gad nacquë' chinnu milë'.

⁶Xxi'n xsoë' Aser nacquë' chinnu milë'.

Xxi'n xsoë' Neftalí nacquë' chinnu milë'.

Xxi'n xsoë' Manasés nacquë' chinnu milë'.

⁷Xxi'n xsoë' Simeón nacquë' chinnu milë'.

Xxi'n xsoë' Leví nacquë' chinnu milë'.

Xxi'n xsoë' Isacar nacquë' chinnu milë'.

⁸Xxi'n xsoë' Zabulón nacquë' chinnu milë'.

Xxi'n xsoë' José nacquë' chinnu milë'.

Xxi'n xsoë' Benjamín nacquë' chinnu milë'.

Bunách guizx yu nácugac lari' chguichdau'z

⁹Gdöd guc lë ni buyú'a' len blé'igacda' bunách zian, nutu nu gac uláb lequë'. Nababquë' yúgu'të yödzy tui' didza' yubl gdu yödzyú. Zuicnë' ca dödl lahui latj blau na' ga ni' zoë' ca' Bönni' na' naquë' Bö'cu' Zxíla'dau', nácquë' lari' chguichdau'z, len zönquë' zin.

¹⁰Tu'ë zidzj didza' yúgu'të, ta'né':

Yöl-la' ruslá za' lu në'ë Dios queëru',

Rö'ë latj blau ni,

Len za' ca' lu në'ë Bönni' na' naquë' Bö'cu' Zxíla'dau'.

¹¹Zuicnë' gdu zbi'il latj blau na', lenca' gdu zbi'il ga nacu'ë bönni' gul, lenca' gdu zbi'il ga nacuá' idáp na' nabangac yúgu'të gbaz la'y, ati' tu'tság lauquë' lyu ca dödl lahui latj blau na', ta'yíj ládxi'quë' Dios, ¹²ta'né':

Ca' gac. Yöl-la' ba Li', Dios
 queëtu',
 Napu' yöl-la' zxön len yöl-la'
 rejni'i.
 Rëtu' Li': "Xclenu'" len runtu' Li'
 ba la'n.
 Napu' yöl-la' uná bë' len yöl-la'
 huac.
 Gactecz cni quiu', Dios queëtu'.
 Ca' gac.

¹³Ni'r gnabnë' neda' tuë' bönni'
 gul na', gnë': "¿Nupx na' nácugac
 lari' chguichdau'z, len gapx bönni'
 lequë'?"

¹⁴Neda' gudxa' lë': "Xan, li'
 nözcznu'."

Lë' gudxë' neda': "Nup ni
 gulazaca' gulagui'tsca. Gulaguibë'
 lari' nácuquë' len guluún leygac
 chguichdau'z len xchönë' Bönni'
 na' naquë' Bö'cu' Zxíla'dau'. ¹⁵Qui
 lë ni na' nacu'ë ca dödl lahui latj
 blau ga röl'ë rna bë'ë Dios, len tunë'
 dxin lahuë' Lë' rël len tē dza lu
 gdau' queë'. Nu na' röl' latj blau ni
 gun chi'i lequë' le zóalentecz lequë'.
¹⁶Cutur la'dunë' len cutur la'bidxë'
 nis, len cutur la'yéguinë' gbidz, len
 cutur láquinë' xla ¹⁷le uyüë' lequë'
 ca nu uyü bö'cu' zxíla' Bönni' na'
 naquë' Bö'cu' Zxíla'dau' zoë' gatsj
 lahui'l latj blau na'. Gch'ë lequë'
 gap ralj nis rui' yöl-la' na'bán, ati'
 Dios uzxië' laquë' nis ta'bödxe'."

Le bugádx le naguel-la' guich

8 Cati' buládzu'ë le bugádx le
 naguel-la' guich na', gröl' dxi
 yehua' yubá gdu gatsj hora. ²Ni'r
 blé'igacda'-në' gadx gbaz la'y na'
 zuicnë' lahuë' Dios, ati' guludödë'
 lu na'quë' gadx trompeta. ³Ni'r
 bidë' yetüë' gbaz la'y, nu'ë tu bdxí'

oro, gzuinë' ra' bcugu yehua' yubá
 ni'. Gulunödzejë' queë' szxöni yal
 quië gunë' lei tuz len yöl-la' rulídz
 Dios glun yúgu'të bunách queë'
 Cristo, uzégui'ë lei lu bcugu na'
 náquini oro, zoa lahui' lau latj blau
 na'. ⁴Gren dzön qui yal na' zoa
 lu në'ë gbaz la'y na', guc tuz len
 yöl-la' rulídz Dios glun bunách queë'
 Cristo, ati' bdxin ga na' röl'ë Dios.
⁵Ni'r budzë'ë bdxí' na' bau' yal
 zoa lu bcugu na' gbaz la'y na', ati'
 gru'në' lei luyú. Gnë gziu' ati' bö
 zidj byön. Gyëp yös len gitit luyú.

Tu'cödxë' trompeta

⁶Ni'r gulacu'ë sina' lucödxë'
 leygac igadxtë' gbaz la'y na' zönquë'
 gadx trompeta na'.

⁷Bucödxë' trompeta gbaz la'y
 zi'al, ati' gröl' guiöj bögui' yöl sunn
 len gui' nutsi'i rön, guluhuöxj luyú.
 Gyegui tu cuia tsa tu tsonn cuia
 luyú ni, ati' gyegui ca' tu cuia tsa tu
 tsonn cuia yag. Gyegui ca' yúgu'të
 guixi' ya'a.

⁸Bucödxë' trompeta gbaz la'y
 buróp na', ati' gbix lu nis zxön tu le
 nac ca tu gui'a zxön regui, ati' böac
 rön yeláti'dau'z ca gatsj tu gatsj nis
 zxön na'. ⁹Gut tu cuia tsa tu tsonn
 cuia le nabangac dzöl' lu nis zxön
 na', ati' guc ditj tu cuia tsa tu tsonn
 cuia yugu' barco.

¹⁰Bucödxë' trompeta gbaz la'y
 bunn, ati' böxj gap dë nis yegu
 lenca' gap ralj nis, tu bölj luzxbá,
 regui ca gui' yör, guc cni qui
 yeláti'dau'z ca gatsj tu gatsj nis
 na' röl' luyú. ¹¹Böjl ni lëba' Ajenjo,
 le nac tu le sla', ati' böac sla'
 yeláti'dau'z ca gatsj tu gatsj nis gap
 na' dë nis, guc ca nac ajenjo na',

ati' glat bunách zian ni'a qui nis na' böac sla'.

¹²Bucödxë' trompeta gbaz la'y budáp, ati' böac chul yeláti'dau'z ca gatsj tu gatsj gbidz, len lëzca' cni guc qui beo', ati' böac chul tu cuia tsa tu tsonn cuia bölj. Cni guc, cutu buzení' gbidz yeláti'dau'z ca gatsj tu gatsj dza, len cutu guluzení' bölj len beo' yeláti'dau'z ca gatsj tu gatsj rël.

¹³Ni'r buyúa' len byönda' ru'ë zidzj didza' tuë' gbaz la'y rdödë' gatsj lahui'l luzxbá, rnë': "Bica' bayechi' lbi'ili'. Bica' bayechi' lbi'ili'. Bica' bayechi' lbi'ili' zoali' luyú ni cati' lucödxë' trompeta yetsonnë' gbaz la'y na'."

9 Bucödxë' trompeta gbaz la'y bugayu', ati' bléida' nu nac ca tu bölj luzxbá böxj luyú, ati' gulunödzjë' qui nu na' zxi'n guia qui latj chul. ²Bsaljë' latj chul na', ati' gren dzön qui latj chul, guc ca dzön r-ruj ga tu'zégui'ë bla'dau', ati' gulachúl gbidz len luzxbá ni'a qui dzön na'. ³Lu dzön na' gularujba' böchi'zú gulazxoazba' luyú, ati' Dios bë'ë lecba' latj ládu'ba' bunách ca tunba' xajno' dzö'ba' luyú. ⁴Gna bé'inë' lecba' cutu lun ditjba' guixi' rö' luyú, len cutu lun ditjba' nitú le nac ya'a, len clëg nitú yag, san tuz gac ládu'ba' bunách na' cudá' ra' xgaquë' lë na' nac bë' nu naqui queë' Dios. ⁵Cutu bë'ë lecba' latj ludódiba' lequë', san lusaca' zi'zba' lequë' gdu ca gayu' beo'. Rlatsca ga rádu'cba' ca na' rla ga rádu'ba' xajno'. ⁶Yugu' dza na' lë'ni ludödi cuingac bunách san cutu la'záqui'në'. Lë'nnë' latië' san ucuít cuini yöl-la' gut.

⁷Nala'cba' böchi'zú na' ca naccba' böa' nácucba' le náquicni guia, quië tsjacba' gdil-l. Dxiagac icjba' le nacgac ca bregui' náquicni oro. Nac laucba' ca nac laugac bunách. ⁸Nac guitsa' icjba' ca nac guitsa' icjnu ngul. Nacgac láya'cba' ca nacgac láya'ba' bëdx guixi'. ⁹Nácugac lchu'cba' le náquini guia. Ta'gú'u bö xilcba' ca na' ta'gú'u bö carreta ná'yjeba' böa' ta'xí'ti'ba' lu gdil-l.

¹⁰Nacgac xbancba' ca nac xbancba' xajno', zoa li'cba'. Lu xbancba' na' zoa le ta'neyba', quië lunba' zi' bunách gdu ca gayu' beo'. ¹¹Zoa nu rna be'ie lecba', nu na' nac gbaz xöhui' qui latj chul. Gbaz ni nazí' lei lu didza' hebreo: Abadón, le rna lu didza' griego: Apolión, len lu didza' xidza': "Nu Rusnít".

¹²Chgdöd tu le rusnít bunách, le za' zi'al, san za'c yechóp le lusnít bunách.

¹³Bucödxë' trompeta gbaz la'y buxzóp, ati' byönda' tu chi'i rui' didza' gatsj lahui' tap le nacgac ca luzba' bëdx, dxiagac yugu' lu squin bcugu na' náquini oro, zoa lahuë' Dios. ¹⁴Chi'i ni rui'len didza' gbaz la'y buxzóp na' zi'a bucödxë' trompeta, rna: "Bsedx idaptë' gbaz xöhui' na' nága'quë' ra' yegu Eufrates."

¹⁵Ni'r busedxë' tapë' gbaz xöhui' na', chnucözë' lequë' Dios quië la' na'z, le nac dza na', len beo' na', len iz na', quië ludöddë' tu cuia tsa tu tsonn cuia bunách nacuá' yödzyú. ¹⁶Byönda' tsca nacquë' bönni' rjaquë' gdil-l dxiaquë'-ba' böa' len dzagquë' tapë' gbaz xöhui' na', nacquë' gdu chop gayuá' mil milë'.

¹⁷Ca tu lu bxin blé'igacda'-ba' böa' na', ati' nup ta'bia lecba' nacu

lchu'gac le nac gui'dau'z len ya'a ca luzxbá len gulj. Nacgac icjba' böa' na' ca icjba' bēdx guixi', ati' lu rú'acba' ta'rúj gui' len dzön len tu le ruzégui'tsca, nazi' lei azufre. ¹⁸Lē na' ta'rúj rú'acba' guludödi tu cuia tsa tu tsonn cuia bunách nacuá' luyú, lē na' nacgac gui' len dzön len lē na' ruzégui'tsca. ¹⁹Ta'rúj rú'acba' le ta'neyba' böa' na' len dzö' lu xbanca', le nacgac xbanca' ca bēl zoa icjba' le ta'neyba'.

²⁰Yezica' bunách, nup cutu glat lu chop ni tu'snít, cutu gulubí'i lādxi'quē' quiē cutur lunē' ca na' tunē', len cutu gulusanē' ta'yíj lādxi'quē' yugu' bö' xöhui' len yugu' bdau' guiöj bdau' yag, yugu' bdau' na' cuta'le'i, len cuta'yöni, len cuta'zá'. ²¹Cutu gulubí'i lādxi'quē' quiē cutur ludödcdē' bunách len clēg quiē cutur lunē' yöl-la' udzá' quequē' len le cunác tunē', len yöl-la' rban quequē'.

Gbaz la'y, zoa lu në'ë tu guichdau'

10 Ni'r blé'ida'-nē' yetüē' gbaz la'y nal, bötjē' brujē' yehua' yubá, nacuē' böaj luzxbá, len zoa bquita' icjē'. Ryēp yös yení' lahuē' ca run gbídz, ati' nacgac ni'ë ca yzxön ta'yegui. ²Zoa lu në'ë tu guichdau' nayájl, ati' tu ni'ë yubél nulibē' lu nis zxön, len yetú ni'ë yögl nulibē' luyú bidx. ³Ni'r bē'ë zidzj didza', byön ca ryön cati' rbódxya'aba' bēdx guixi', len cati' budx bē'ë zidzj didza' na', gulayón chi'igac gadx gziu'. ⁴Cati' budx gulayón chi'igac gziu' na', neda' zi'a uzuja' lu guich, san byönda' nu rui' didza' yehua' yubá, rē neda': "Bcachi'z didza' ni glui' gadx gziu' na'. Cutu uzuju' lu guich didza' na'."

⁵Ni'r bchis në'ë yubél zaca' luzxbál gbaz la'y na' blé'ida'-nē' zuinē' lu nis zxön len luyú bidx, ⁶ati' ben tsutsu xtídzē'ë gneynē' Nu na' zoacz, Nu na' ben yehua' yubá len le nacuá' ni', lenca' yödzlyú len le nacuá' ni', lenca' nis zxön len le nacuá' ni', gnē': "Cutur tsey, ⁷san cati' ucódxē' trompeta gbaz la'y bugádx, uschinē' Dios le nagachi' queē', lē na' bului'inē' yugu' huen dxin queē', bönni' ni' glu'ë didza' uláz queē'."

⁸Ni'r bē'len neda' didza' leyúbl chi'i na' byönda' r-ruj yehua' yubá, gna: "Gyeaj, yajxí' guichdau' nayájl na' zoa lu në'ë gbaz la'y na' nulibē' lu nis zxön len luyú bidx."

⁹Gyija' ga na' zoē' gbaz la'y na', gnabda'-nē' gunnē' quia' guichdau' na'. Gudxē' neda' gbaz la'y na', gnē': "Gzxi', gdagu. Lu ru'u gac zxix ca nac bdxindu' queēba' böz, san lē'u huöac sla'."

¹⁰Gzxi'a guichdau' na' zoa lu në'ë len gdahua' lei. Lu ru'a guc zxix ca nac bdxindu' na', san cati' budx gdahua' lei, böac sla' lē'a. ¹¹Ni'r gudxē' neda': "Ral-la' gu'u didza' leyúbl uláz queē' Dios laugac zian cö' bunách gza'a, len gap nacuá' yúgu'tē yödz, len gap tui' zian didza' yubl, len laugac zian bönni' ta'ná bē'."

Chopē' bönni' tunē' ina' lau

11 Ni'r bdxin nu benn quia' tu gui le nac ca tu yag rbixi, len gudx neda': "Gyas len brix gdau' queē' Dios. Brix ca' bcugu la'y qui, len blab ca' nup nacuá' ni' ta'yíj lādxi'gac Dios. ²Lö'a qui gdau' na' dē ni'l bca'n ca' len cutu urixu' lei,

le nadóð lu na'gac bunách gza'a, ati' lulíð lulíy yóðz la'y na' gdu ca chopún beo'."

³Gudxè' ca' neda': "Gsöla'a chopè' bönni' lunè' lna' lau quia', lu'è didza' uláz quia' gdu ca chinnu gayuá' yu tsonnlalj dza, lacuè' lari' nac bdzadzau'. ⁴Chopè' bönni' ni tunè' lna' lau, nacquè' chop yag olivo na' nayúj lu guich la'y le rui' didza' quequè', len nacquè' ca' chop le nua'gac gui' na' nacuá' lahuè' Dios, Xani yóðzlyú. ⁵Chqui' guè'ni nu gua' dö' quequè', gruj gui' rú'acquè' le usnít nu na' rē'ni gua' dö' quequè', gdödi nu na', lenca' nup ta'dá'baga' lequè'. ⁶Dè lu na'què' chopè' ni luzaguè'è xnöz nis guiøj luzxbá, cui gal guiøj tsca dza na' ral-la' lu'è didza' uláz queè' Dios, ati' dè lu na'què' ca' lunè' ga huöac rön nis, len lunè' ga gatsj guidzhué' yóðzlyú, lunè' cni bálti'téz lzu lē'nnè'. ⁷Cati' udx lunè' lna' lau, grujba' böa' snia' latj chul, tíl-lenba' lequè' len uxicjba' lequè', len gdóðiba' lequè'. ⁸La'túlz ca' la' nöz lu yóðz zxön gdu ca gulayá' gulabinè', ga ni' gdè'è ca' lē'i yag cruz Xanru', len ca runru' lsaquí', nazí' lei ca' Sodoma lenca' Egipto. ⁹Gdu ca tsonn dza yu gatsj la'le'i gdu ca gulayá' gulabinè' bunách yúgu'tè yóðz len yúgu'tè bunách gza'a, len bunách tui' zian didza' yubl, len bunách yúgu'tè luyú, ati' cutu lui' latj nu ucachi' lequè' yeru ba. ¹⁰La'dzagtsca ládxi'gac nup nacuá' yóðzlyú le glatiè', ati' lu yöl-la' rudziji quequè' la'söl'è le lunödzjè' quequè' lza'què' tuè' yetuè', le gulusaca' zi'è bunách

nacuá' yóðzlyú chopè' ni glu'è didza' uláz queè' Dios."

¹¹Ni'r cati' chbza'a tsonn dza yu gatsj na', Dios buspanè' lequè', ati' gulayasè' gulazuinè', ati' gladxi guladzöbi yúgu'tè nup gulale'i lequè'. ¹²Ni'r bè' zidz didza' tu chi'i yehua' yubá, gudx lequè': "Gul-cuén ni."

Gulabenè' lu böaj luzxbá zaca' yehua' yubál, ati' gulale'i lequè' nup na' guladá'baga' lequè'. ¹³La' ni'z gtittsca luyú, ati' bguindj tu cuia tsa tu chi cuia yugu' yu'u dzö' lu yóðz na', ati' lu le gtit na', glat tsonnlalj yu chi gayuá' bunách. Gladxi guladzöbi nup ni' naga'ngac, ati' gulagu'è yöl-la' ba Dios zoè' yehua' yubá.

¹⁴Chgdöd le buróp le rusnít bunách, ati' chzoa gdxin le bunn le usnít lequè'.

Rucödxè' trompeta gbaz la'y bugádx

¹⁵Bucödxè' trompeta gbaz la'y bugádx, ati' glui' zidz didza' chi'i yehua' yubá, ta'ná:

Gap ta'ná bè' bunách yóðzlyú
Nadödgc lu nē'è Xanru' Dios
Len lu nē'è Cristo.

Lè' gna bé'teczè'.

¹⁶Ni'r idáp uru'è bönni' gul na' rö'què' gap na' ta'ná bè'è lahuè' Dios, gulutság lauquè' lya ta'yj ládxi'què' Dios. ¹⁷Ta'né':

Xantu' Dios, napczu' yöl-la' huac.
Gzoaczu' len zoaczu' len ral-la'
guidczu',

Xclenu', le chbugunu' dxin
yöl-la' huac zxön quiu'

Len rzu lau' rna bè'u.

¹⁸Gulaléy bunách yugu' yóðz

San chbdxin dza gunu' lequë'
zxguia'.

Nac dza cuequi xbeynu' nup
chnatgac.

Ubi'u quegac huen dxin quiu',
Bönni' glu'ë didza' uláz quiu',
Nup náquigac quizi quiu' len
glun ba la'n Lau',

Nup nacgac cuidi'z len nup
nacgac blau.

Chbdxin dza usnituu' nup
gulusnít yödzlyú.

¹⁹Ni'r gyalj gda'u queë' Dios rö'
yehua' yubá, ati' bla' lahui gui'n
la'y ga yu'u didza' rucá'n tsahui'
nunë' Dios. Luyú gyëp yös len glu'u
bö zidzj, gnë gziu'. Gtit luyú len grö'
guiöj bögui' yöl sunn.

Tunu ngul len tuba' bël zxön xtsni'

12 Ni'r bla' lahui yehua' yubá
tu le nac bë'tsca, buluí'
launu ngul nácunu le nac ca gbidz,
len zoa zxan ní'anu beo'. Dxia
icjnu tu bregui' ga dxiacba' chinnu
bölj yení'. ²Ngul ni chzoa soabi'
bi'idau' queënu, rbódxya'anu le rdia'
lë'nu, rzaca' rguí'nu le ruzoanu-bi'
bi'idau' queënu. ³Ni'r bla' lahui
yehua' yubá yetú le nac bë', buluí'
lauba' tuba' bël zxön xtsni', nacba'
xna gui'z len dxia gadx icjba' len
chi luzba' len dxia tu bregui' tu tu
icjba' na'. ⁴Len xbanba' gu'yjba' tu
cuia tsa tu tsonn cuia bölj luzxbá
len gru'nba' leycba' luyú. Gzuiba'
bël zxön xtsni' na' launu ngul na'
chzoa soabi' bi'idau' queënu, zoaba'
sina' gáguba'-bi' bi'idau' queënu
na' ca galjbi' na'. ⁵Buzoanu-bi' tubi'
bi'i bönni'dau' ral-la' gna bé'ibi'
yúgu'të yödz len tu xuyág guia. La'
bucuittë'-bi' Dios bi'idau' queënu

na', buchisë'-bi' ga ni' zoaczë'

Lë', rö'ë latj blau ga na' rna bë'ë.

⁶Buzxundjnu ngul na', zeajnu lu latj
ca'z, ga ni' chnupé'ë queënu latj
Dios. Ni' lugahuë'-nu gdu ca chinnu
gayuá' yu tsonnlalj dza.

⁷Gdöd glac lë ni, guctscá gdil-l
yehua' yubá. Guladíl-lenë'-ba' bël
zxön xtsni' na' gbaz la'y blau lë'
Miguel len yugu' gbaz la'y da'quë' lë'.
Guladíl-l bël zxön na' len gbaz xöhui'
da'gac lëba' ⁸san cutu guluxícj lu
gdil-l na'. Qui lë ni na' cutur bdzöli
xlatjgac yehua' yubá. ⁹Cni guc,
gularu'në'-ba' ni'l bël zxön xtsni' na',
nacba' bël na' zoaba' dza ni'të, lëba'
tu' xöhui' len Satanás, nu na' rzi' ye'i
yúgu'të bunách yödzlyú. Gularu'në'
tu' xöhui' yödzlyú, dzaggac lei gbaz
xöhui' na' da'gac lei.

¹⁰Ni'r byönda' tu chi'i rui' zidzj
didza' yehua' yubá, rna: "Na'a
chbdxin dza nulu'ë lahui yöl-la'
ruslá nunë', len yöl-la' huac queë',
len le rna bë'ë Dios, lenca' le rna
bë'ë Cristo, le chgularu'në' ni'l nu
na' buquí yugu' böchi' lza'ru'. Rë'l
len të dza buquí lequë' lahuë' Dios
queëru'. ¹¹Guluxicjè' nu na' böchi'
lza'ru' ni, le gulugunë' dxin xchönë'
Bönni' na' naquë' Bö'cu' Zxíla'dau'
queë' Dios, len le gulugunë' dxin
didza' na' glunë' lna' lau queë'.
Cutu glui' ládxi'quë' yöl-la' na'bán
quequë' san glatië'. ¹²Qui lë ni
na' gac yöl-la' rudziji yehua' yubá.
Gul-dziji lbi'ili', zoali' ni'. Bica'
bayechi' lbi'ili' zoali' yödzlyú len lu
nis zxön, le chbötj tu' xöhui' bdxin
ga zoali'. Rleytsqui tu' xöhui' na' le
chráquibe'i yetú chi'z dë latj qui'."

¹³Cati' gúquibe'iba' bël zxön
xtsni' na' chgularu'në'-ba' luyú,

ni'r yajsóa régu'ba'-nu ngul na' buzoanu-bi' bi'i bónni'dau' na' queënu. ¹⁴Ni'r Dios bè'è-nu ngul na' chop xilba' bsia' nacgac zxön quië gac sunu, gcuitnu ga na' zoaba' bèl zxön xtsni' na', gdxinnu xlatjnu lu latj ca'z. Ni' lugahuë'-nu gdu tsonn iz yu gatsj. ¹⁵Zaca' cúdzu'lnu gubba' nis zil bèl zxön xtsni' na', guc ca tu nis yegu, gú'niba' gual'tè ngul na'. ¹⁶Ni'r guclen ngul na' luyú, gyalj luyú na' len güi'i nis yegu na' gubba' bèl zxön xtsni' na'. ¹⁷Ni'r gléytsquiba'-nu ngul na' bèl zxön xtsni' na', gyeajba' yajtíl-lenba' nup naga'ngac queënu xzi'n xsoanu, nup na' tun ca rna le gna bè'è Dios, len nazí' lu na'gac le nunë' lna' lau Jesucrsto.

Chopba' böa' snia'

13 Gzuida' lu yuzx ra' nis zxön len blé'ida' rbenba' r-rujba' lu nis zxön tuba' böa' snia' dxia gadx icjba' len chi luzba'. Dxiagac lëba' chi bregui'. Dxia tu bregui' tu tu luzba' na' ati' láhuigac icjba' da' tu la nac xöhui' le curle'i Dios dxi'a. ²Böa' snia' na' blé'ida'-ba' rna'ba' ca nacba' bëdxtau', zoa ní'aba' ca nac ní'aba' oso, ati' rú'aba' nac ca nac rú'aba' bëdx guixi'. Bël zxön xtsni' na' budödba' lu na'ba' böa' snia' ni yöl-la' huac queëba' lenca' xlatjba' ga rna bè'ba', len yöl-la' uná bè' zxön queëba'. ³Dxia huë' tu icjba' böa' snia' na', nac le gdödi lëba', san bunít huë' na', ati' gulubani yúgu'tè bunách yödzyú len yajta'gac böa' snia' na'. ⁴Gulayíj ládxi'quë'-ba' bèl zxön xtsni' na', le budödba' lu na'ba' böa' snia' yöl-la' uná bè' queëba'. Gulayíj ládxi'quë'-ba' ca' böa' snia'

na', gulané': "¿Nuzxa caz nac zxön ca nacba' zxön böa' snia' ni, len nuzxa caz saqui' til-len lëba'?"

⁵Guta' lu na'ba' böa' snia' na' bè'ba' didza' ba zxön len didza' xöhui' rnëba' queë' Dios. Gdu ca chopún beo' guta' lu na'ba' yöl-la' uná bè'. ⁶Gzu lauba' rnëba' queë' Dios len gnë xöhui'ba' qui Lë' Dios, len qui latj la'y queë', len quegac nup nacua' yehua' yubá. ⁷Guta' lu na'ba' gdíl-lenba' nup náquigac quizi queë' Dios, buxicjba' lequë'. Guta' ca' lu na'ba' gna bé'iba' yúgu'tè bunách gza'a, bunách yúgu'tè yödz, len yúgu'tè bunách tui' didza' yubl, len bunách gdu'tè yödzyú. ⁸Gulayíj ládxi'gac böa' snia' na' yúgu'tè bunách nacua' yödzyú, nup na' cutu nayujgac lagac lu guich qui yöl-la' na'bán, guich na' buzujë' cati' zi'a guta' yödzyú Bönni' na' naquë' Bö'cu' Zxíla'dau' queë' Dios, buzöë' Dios gutië' ni'a quegac bunách queë'.

⁹Chqui' nu ryöni, ral-la' uzé nag. ¹⁰Nup nucu'ë Dios gdzungac, ral-la' gdzungac, ati' nup nucu'ë Dios quië nu gdödi leygac len guia tuchi', len guia tuchi' lat. Qui lë ni na', ral-la' la'bóz zxön ladxí' nup náquigac queë' Dios, len la'yejlë' Lë'.

¹¹Gdöd na' blé'ida'-ba' yetuba' böa' snia' grenba' brujba' lu yu. Dxiagac chop luzba' ca nac luzba' bö'cu' zxila', len rui'ba' didza' ca na' rui'ba' didza' bèl zxön xtsni' na'. ¹²Dë lu na'ba' böa' snia' ni yúgu'tè yöl-la' uná bè' queëba' böa' snia' bdxinba' zi'al, cati' dzag lëba'. Runba' böa' snia' buróp ni ga ta'yíj ládxi'gac böa' snia' zi'al na' yúgu'tè bunách nacua' yödzyú, böa' na'

bunít huè' gdödi læba'. ¹³Runba' ca' le nacgac bë' böa' buróp na' ga rdxintë runba' ga ruhuó'xj gui' za' luzxbá, ruhuó'xj luyú laugac yúgu'të bunách. ¹⁴Rzi' yé'iba' bunách nacuá' yödzyú len le nacgac bë' dë lu na'ba' runba' lauba' böa' snia' zi'al na'. Rna bé'iba' bunách nacuá' yödzyú lunë' tu bdau' ca nacba' böa' snia' na' gucba' huè' qui guia tuchi' ati' nabanba'. ¹⁵Dë lu na'ba' runba' ga soa gban bdau' na' nac ca nacba' böa' snia' zi'al na', len güi' didza' bdau' ni len gun ga nu gdödi yúgu'të nup cutu la'yíj ládxi'gac lei. ¹⁶Benba' ga gda' yúgu'të bunách tu le nac bë' da'gac læba', nup nacgac ca'z len nup nacgac blau, nup ta'le'i yöl-la' tsahui' len nup nacgac yechi', nup cunadá'ugac len nup nadá'ugac, buda'ba' lei lu na'gac yubél o ra' xgagac bunách na'. ¹⁷Nutu nu gac bi ga'u o bi guti' chqui' cudá' nu na' læ na' nac bë', o chqui' cudá' nu na' laba' böa' snia' na', o le nababba' nua'ba'. ¹⁸Na'a rquinnu' yöl-la' rejni'i. Nu nap yöl-la' rejni'i ral-la' ulabtëz tsca le nababba' nua'ba' böa' snia' na', nac ca le nababë' bönni', ati' le nababba' na' nac xop gayuá' yu tsonnlaj yu xop.

Le tul-lë' tu gayuá' yu
tapún milë' bönni'

14 Gdöd ni' buyúa' len blé'ida'-në' Bönni' na' naquë' Bö'cu' Zxíla'dau' zuinë' lu guí'adau' nazí' lei Sión. Nacuá'lenë' Lë' tu gayuá' yu tapún milë' bönni', da' ra' xgaquë' lë' Bönni' na' naquë' Bö'cu' Zxíla'dau', lenca' lë' Xuzë'. ²Ni'r byönda' tu le rgu'u bö yehua' yubá, rnë zidzj ca rnë tu yegu zxön len

ca rnë zgiu'. Byönda' le ryön cati' ta'guinnië' lë'i tu le rul-l zë zian du qui. ³Tul-lë' tu le rul-l cub, nacu'ë ca dödl lahui latj blau ni' lenca' ca dödl lahui ga na' nacuá' idáp nup na' nabangac len yugu' bönni' gul na'. Nutur nu gac gul-l le rul-l ni, san légaczë' tu gayuá' yu tapún milë' bönni' ni, bönni' na' böa'uë' lequë' Cristo ladj bunách yödzyú. ⁴Nacquë' gdu ladxí' bönni' ni, cutu gulacuá'lenë' ngul, le nacquë' gdu bönni' ra'bán. Zjáclenë' Bönni' na' naquë' Bö'cu' Zxíla'dau' gátitëz ga zijë'. Cristocz böa'uë' lequë' ladj bunách, naquë' bönni' zi'al guludód cuinquë' lu në'ë Dios lenca' lu në'ë Bönni' na' naquë' Bö'cu' Zxíla'dau'. ⁵Gatga gulazí' yë'ë ati' nutu nu gac bi gnë quequë' ga na' nacu'ë ca dödl lahui latj blau ga rö'ë Dios.

Didza' rjua'quë' tsonn gbaz la'y

⁶Ni'r blé'ida' yetüë' gbaz la'y, rdödë' lu bö'z luzxbá, rju'ë didza' dxi'a zoa tsalzú quië gunë' lban qui laugac nup nacuá' yödzyú, bunách gdu'të luyú, yúgu'të bunách gza'a, len bunách tui' yúgu'të didza' gza'a, len bunách yúgu'të yödz. ⁷Ru'ë zidzj didza', rnë': "Gul-gadxi Dios, len gul-cu'ë yöl-la' ba le chzoa cuequi xbeynë' bunách. Gul-tséj ladxë'ë Dios, nunë' luzxbá len luyú len nis zxön len gap ralj nis."

⁸Zajnáuë' gbaz la'y ni yetüë' gbaz la'y, rnë': "Chbudx qui yödzt Babilonia. Chbudx qui yödzt zxön na'. Cni guc qui, le glun nup nacuá' ni' ga gulazí' lu na'quë' bönni' yúgu'të yödz lunë' ca nacgac le ta'zë ládxi'quë' le cunác."

⁹Zajnáuë' gbaz la'y buróp ni yetúë' gbaz la'y, ru'ë zidzj didza', rnë': "Chqui' nu tsej ladxi'-ba' böa' snia' na' lenca' bdau' queëba', len güi' latj ta' ra' xguí o lu në'i le nac bë' da' lëba', ¹⁰nu ni gunë' zxguia' Dios lu yöl-la' rley queë'. Saca' qui' nu na' lu gui' len lu lë na' ruzégui'tsca, laugac gbaz la'y len lahuë' Bönni' na' naquë' Bö'cu' Zxíla'dau'. ¹¹Cuentecz dzön qui gui' ga ni' saca' qui' nu na'. Rël len të dza saca' qui', ati' gatga gata' latj luzí' ládxi'gac nup la'yíj ládxi'gac-ba' böa' snia' na' len bdau' queëba', ati' cutu luzí' ládxi'gac nup lui' latj ta' leygac laba'. ¹²Qui lë ni na' ral-la' la'böz zxon ladxi' nup náquigac queë' Dios len lun ca rna le gna bë'ë, nup na' ta'yejlë' Jesús."

¹³Ni'r byönda' chi' ni rui' didza' yehua' yubá, rë neda': "Bzuj lu guich lë ni: Bica' bagac nup lat na'a su lau, nup na' ta'yejlë' Xanru'."

Dios Bö' La'y rnë': "Ca' gac. Luzí' ládxi'quë' lu dxin glunë', len luzi'ë xbey ca rajlöz le glunë'."

Tu'zi'ë le rulá' luyú

¹⁴Ni'r buyúa' len blé'ida' tu böaj luzxbá chguichdau'z, len lu böaj na' röl' tu Nu nac ca naquë' Bönni' Nuhuöaquë' Gdu Bunách, dxia icjè' tu bregui' oro, ati' lu në'ë zönë' tu guia tuchi'. ¹⁵Brujè' lu gdau' yetúë' gbaz la'y, ati' bë'ë zidzj didza', gudxë' Nu na' röl' lu böaj na', gnë': "Bgun dxin guia tuchi' quiu' len bchugu zxoax' ttil, le chbdxin dza nu uzí' lei. Chnabídx deu qui dë yödzyú."

¹⁶Ni'r Nu na' röl' lu böaj na' bugún dxin guia tuchi' gdu'të yödzyú, ati' buzi'ë le bulá' luyú.

¹⁷Ni'r brujè' yetúë' gbaz la'y lu gdau' zoa yehua' yubá. Nu'ë ca' tu guia tuchi'. ¹⁸Brujè' ra' bcugu ni' yetúë' gbaz la'y, dë lu në'ë gna bë'inë' gui', ati' bë'ë zidzj didza', bulidzè' gbaz la'y zi'al na' nu'ë guia tuchi', gnë': "Bgun dxin guia tuchi' quiu' len btub tu'xóa hueaj le ta'bía lba uva rögac yödzyú, le chna le ta'bía lba uva."

¹⁹Ni'r bugunë' dxin guia tuchi' gdu yödzyú gbaz la'y ni, butubë' le ta'bía lba uva rögac luyú, ati' yajchu'në' le ta'bía lba uva na' lu yeru zxon ga gzi xisi. Yugu' lë ni rulu'f' ca gunë' Dios, gunë' zxguia' bunách nacuá' yödzyú. ²⁰Gululibë' le ta'bía lba uva na' lu lerui zoa ni'l ra' yödzyú, ati' lu lerui na' bruj rön, gren ga bdxintë' rú'acba' böa', len gdöd rön na' gdu tsca gac sa'ru' gdu gadx dza.

Gbaz la'y nua'quë' gadx guidzhué'

15 Blé'ida' yetú le nac bë'tsca yehua' yubá, le run ga nu rubani. Gularujè' gadx gbaz la'y, nua'quë' gadx guidzhué' rajséy'tëgac, le ugunë' dxin Dios, udx gunë' zxguia' bunách yödzyú.

²Blé'ida' ca' tu le nac ca nis zxon ryëp yös yení' ca guiöj jar le nutsí'i gui'. Zuigac lu lë na' nac ca nis zxon nup na' guluxí'c lu böa' snia' na' len lu bdau' queëba' len lu laba', nua'quë' le tul-l, yugu' le bë'ë quequë' Dios. ³Tul-lë' le rul-l na' bil-lë' Moisés, bönni' huen dxin queë' Dios. Nac tu le rul-l queë' Bönni' na' naquë' Bö'cu' Zxíla'dau', ta'né':

Li', Xantu' Dios, náctëru' blau.
Zxöntër nac yúgu'të le benu',

Le tun ga rubánitu'.
Li', rna bé'inu' yugu' yödz,
Gdu dxí'adau' len gdu nac ca bi
runu'.

⁴ ¿Nuzxa caz cugadxi Li', Xantu'?
¿Nuzxa caz cucú'u Li' yöl-la' ba?
Tuzu' Li' nacu' la'y.

La'dxín bunách yugu'të yödz,
La'yíj ládxi'quë' Li'

Le ta'lé'inë' nac tsahui' yúgu'të
le runu'.

⁵Gdöd guc læ ni, buyúa' len
blé'ida' gyalj gdau' yehua' yubá ga
ni' dë latj la'y le nac bë' zóalenë'
bunách queë' Dios. ⁶Gularujë' lu
latj la'y na' gadx gbaz la'y, nua'quë'
gadx guidzhuë' na'. Nácuquë' lari'
záqui'tsqi le ryëp yös yení', len
núga'gac lchú'quë' pan náquicni
oro. ⁷Ni'r tu nu nutsa' ladj idáp
nup na' nabangac, bë' qui queëquë'
gadx gbaz la'y na' gadx zxíga'dau'
náquicni oro, len yudzgac le ruluí'
yöl-la' rley queë' Dios zoacze'. ⁸Lu
latj la'y na' bdza' dzön, le zoa ni'
yöl-la' yení' len yöl-la' huac zxön
queë' Dios. Nutu nu saqui' tsaz
lu latj la'y na' cati' gatsjr gadx
guidzhuë' na' nua'quë' gadx gbaz
la'y na'.

**Yugu' zxíga'dau' yudzgac le
ruluí' yöl-la' rley queë' Dios**

16 Ni'r byönda' chi'i nu rui'
zidzj didza' latj la'y na', rë
gadx gbaz la'y na', rna: “Gul-tséaj,
gul-tsajlálj luyú gadx zxíga'dau' na'
yudzgac læ na' ruluí' yöl-la' rley
queë' Dios.”

²Gyijë' gbaz la'y zi'al, yajlaljë'
yödzlyú le yudz zxíga'dau' na' zönë'.
Lë na' yudz zxíga'dau' na' ben ga
gutsj yudzu' ya'a le rlatasca gdu ca

nayá' nabingac nup na' da' leygac
le nac bë' da'gac böa' snia' na',
lenca' nup na' ta'yíj ládxi'gac bdau'
queëba'.

³Ni'r gyijë' gbaz la'y buróp,
yajlaljë' lu nis zxön le yudz
zxíga'dau' na' zönë', ati' böac rön
nis na' ca nac rön queë' bönni' nat,
ati' glat yúgu'të nup nabangac
nacuá' lu nis zxön na'.

⁴Gyijë' gbaz la'y bunn, yajlaljë'
gap dë yegu len gap ralj nis le yudz
zxíga'dau' na' zönë', ati' guluhuóac
rön gap dë nis na'. ⁵Ni'r byönda'
ru'ë didza' gbaz la'y na' dë lu në'ë
rna bé'inë' nis na', rnë: “Xantu'
Dios La'y. Zoaczu' len gzoaczu'.
Tshhui' nacu' le rchugu' cni quegac
bunách ⁶le gululaljë' rön quegac
nup náquigac quizi quiu' len quegac
nup glui' didza' uláz quiu'. Na'a, Li'
runu' ga li'ljë' rön, le cni ral-la' gac
quequë'.”

⁷Ni'r byönda' rui' didza' tu nu
zoa ra' bcugu yehua' yubá ni', rna:
“Ca' gac, Xantu' Dios, napczu' yöl-la'
uná bë'. Gdutë li len tsahui' nac ca
rchugu' quegac bunách.”

⁸Gyijë' gbaz la'y budáp na',
yajlaljë' lu gbidz le yudz zxíga'dau'
na' zönë', ati' gbidz na', bë'ë lei latj
Dios gúgui'tsca bunách len gui' qui.
⁹Gúguitscaquë' yúgu'të bunách le
rúgui'tsca gbidz, san cutu gulubí'i
ládxi'quë', len cutu gulagu'ë Dios
yöl-la' ba. Gulané' zi'ë queë' Dios,
dë lu në'ë gna bé'inë' yugu' læ ni
tu'saca' zi' bunách.

¹⁰Gyijë' gbaz la'y bugayu' na',
yajlaljë' xlatj böa' snia' ga na' rna
bë'ba' le yudz zxíga'dau' zönë',
ati' grö' chul gap rna bë'ba'. Ni'r,
le gulazaca' gulagu'í bunách,

gláguya'a lúdxì'què', ¹¹ san cutu gulubí'i ládxi'què' quiè cutur lunè' le cunác tsahui' tunè'. Gulané' zì'è queè' Dios zoè' yehua' yubá le ta'zaca' ta'gui'è len le dxiaquè' yudzu' ya'a na'.

¹²Gyijè' gbaz la'y buzxóp na', yajlaljè' lu yegu zxön nazí' lei Eufrates le yudz zxíga'dau' na' zönè', ati' gbidx nis yegu na' quiè gba'a nöz ga la'dód nup ta'ná bè', la'rujè' zaca' ga rlen gbidz.

¹³Ni'r blé'ida' bèl zxön xtsni' na', len böa' snia' na', len bönni' ru'è didza' uláz quecba', gularúj rú'agac nup na' tsonn bö' xöhui' tun ditj bunách, nala'gac ca nala'cba' bludz.

¹⁴Nacgac bö' qui tu' xöhui' yonn bö' ni, bö' tun le nacgac bè' lun ga lubani bunách. Yjac bö' xöhui' na' gdu yödzyú yajtubgac nup ta'ná bè', quiè tsjaquè' lu gdil-l na' gac dza zxön queè' Dios, napczè' yöl-la' uná bè'. ¹⁵Cni rnè' Dios: "Gul-yutsca'.

Guida' tu tsalz ca rdxinè' gban. Bica' ba nu zoa ban ladxi' len run chi'i le nacu nu na', len runtecz dxi'a, cui gun bayúdx ta xguidz len cui utuí'i nu na' lahui' laugac bunách."

¹⁶Gulutúb bönni' ta'ná bè'è bö' xöhui' na', guludubè' tu latj nazí' lei lu didza' hebreo: Armagedón.

¹⁷Gyijè' gbaz la'y bugádx na', yajlaljè' lu bö'z le yudz zxíga'dau' na' zönè', ati' bè' zidz didza' tu nu zoa lu latj la'y zoa yehua' yubá ga dè latj blau na', rna: "Chnac."

¹⁸Ni'r gyèp yös len grò'tsca bö len gnè gziú'. Gtittsca luyú, le gtittèr ca gtit tsal ni nacuá' bunách yödzyú. ¹⁹Bruj tsonn cò'l yöd z xön na' ati' gulaguíndj yöd nacuá' yödzyú. Yajneyne' Dios le

nac xöhui' glun bunách yöd z xön na' nazí' lei Babilonia, ati' lu yöl-la' rley queè' benè' zxguia' nup nacuá' ni'. ²⁰Gulagachi' luyú bidx dzò' lu nis zxön ati' cutur gulalá' guí'adau'. ²¹Böxj ca' guiøj bögui' yöl sunn, le za' luzxbá, yajsóa icjgac bunách, ati' náli'i guiøj bögui' na' ca tu gayuá' guia hueaj. Gulané' zì'è queè' Dios yúgu'tè bönni' ni'a qui guiøj bögui' na' grò', le busaca' zì'tsca lequè'.

Dios rchuguè' queènu ngul udá dzag

17 Ni'r bdxinè' ga zoa' tuè' gbaz la'y nababè' gadx gbaz la'y na' gulazönè' gadx zxíga'dau' na' náquicni oro. Bè'lenè' neda' didza', gnè': "Gda ni, ati' ului'ida' li' ca gunè' Dios, gunè'-nu zxguia' ngul udá dzag na', rön'u lu nis zian. ²Gulacua'len lènu, glun le cunác nup ta'ná bè' yödzyú, ati' gulazudxi nup nacuá' yödzyú ni, glunlen lènu le cunác."

³Gzóalenè' neda' Dios Bö' La'y, ati' bchè'è neda' gbaz la'y na' tu lu latj ca'z, ati' ni' blé'ida'-nu ngul dxianu cúdzu'ba' tuba' böa' snia', nacba' xna gui'z. Dxiagac gadx icjba' len chi luzba', len da'gac ca' lèba' le ta'né' xöhui' queè' Dios. ⁴Nácunu lari' xna len lari' xna gui'z ngul na' dxianu lèba'. Nazí' lquitj queènu le náquicni oro len yugu' guiøj zaca' len yugu' bga. Lu na'nu zoa tu zxíga'dau' náquini oro, yudzu le nacgac xöhui' len le cunác runnu. ⁵Ra' xganu da'gac ca lènu, le tu'luí' tu le nagachi', ta'ná cni: "Yöd z Babilonia Nac Blau" len "Xna'cnu Ngul Udá Dzag" len "Xna'gac Le Xöhui' Dzò' Yödzyú."

⁶Gúquibe'ida' nazúdxinu ngul na'

le bennu ga blalj rön quegac nup náquigac queé' Dios len quegac nup na' zoa nu budódi leygac le glun lna' lau queé' Jesús. Cati' blé'ida'-nu, bubántsquida'. ⁷Gudxé' neda' gbaz la'y na', gnè': "¿Bixz quiè rubániu'?' Uzéj'ni'da' li' lè na' nagachi', le ruluí' ngul ni lenca' le ruluí' böa' snia' na' dxianu-ba', dxiagac gadx icjba' len chi luzba'. ⁸Böa' snia' na' blé'inu' gzoaba' zi'al san cutu zoaba' na'a, böa' ni chzoa grujba' latj chul, ati' tseajba' ga nitba' tsaz. Lubánitsqui nup nacué' luyú cunayujgac lagac lu guich qui yöl-la' na'bán dza ni'té cati' zi'a gata' yödzyú. Cati' la'le'i böa' snia' na' gzoaba' zí'atèl san cutu zoaba' na'a, lubani le ubanba'.

⁹Lè ni nac tu le uzejni'i nu gac tsejni'i: Gadx icjba' na' tu'luú' gadx guí'adau' gap rò'nu ngul na'. ¹⁰Lèzca' cni gadx icjba' na' tu'luú' gadxè' bönni' ta'ná bè'è. Gayuè' bönni' ni chgdöd quequè'. Tuè' bönni' ni rna bè'è na'a ati' yetúè' cutu rdxindè', san cati' guidè', gna bè'è tu chi'idau'z. ¹¹Böa' snia' na' gzoaba' san cutu zoaba' na'a, ruluí' bönni' buzunu', gna bè'è. Nunè' tsazxón bönni' gadx na', ati' töd ni nitiè' tsaz.

¹²'Chi luzba' na' blé'inu' tu'luú' chiè' bönni' la'ná bè'è. Cutu ta'zi'inè' yöl-la' uná bè', san la'zi'è yöl-la' uná bè' tu chi'idau'z, la'ná bè'è tsazxón len böa' snia' na'. ¹³Chiè' bönni' ni, tuz nacquè', ati' ludödè' lu na'ba' böa' snia' na' yöl-la' uná bè' quequè' len le dè lu na'què'. ¹⁴La'díl-lenè' Bönni' na' naquè' Bö'cu' Zxíla'dau' san Lè' uxicjè' lequè', le naquè' Xangac yúgu'tè nup nacgac xan len rna

bé'inè' ca' yúgu'tè nup ta'ná bè'. Nup nacua'len Lè', bulidzè' leygac Dios len gröè' leygac, ati' tsaz da'gac Lè'."

¹⁵Gudxé' ca' neda' gbaz la'y na', gnè': "Yugu' nis zxön na' blé'inu' gap ni' rò'nu ngul udá dzag na', tu'luú' bunách yöd'z len bunách gza'a len bunách tui' didza' yubl len bunách yugu' luyú. ¹⁶Chi luzba' böa' snia' na' blé'inu' len tu'luú' chiè' bönni', cutu la'lé'inè'-nu dxi'a ngul udá dzag na', ati' ca'z len xguidz luca'nè'-nu. Lahuè' xpéla'nu len luzégui'è-nu len gui'. ¹⁷Dios uchiziè' icj ládxi'dau'què' chiè' bönni' na' le gun ga lunè' ca' rè'ncznè' Lè', lacquè' tuz len ludödè' lu na'ba' böa' snia' na' yöl-la' uná bè' quequè' quiè utság ca' rna xtidzè'è. ¹⁸Ngul na' blé'inu'-nu ruluí' yöd'z zxön na' rna be'i nup ta'ná bè' yöd'zlyú ni."

Rguindj yöd'z Babilonia

18 Gdöd na' blé'ida'-nè' yetúè' gbaz la'y ruhuötjè' r-rujè' yehua' yubá, dè lu nè'è yöl-la' uná bè' zxön, ati' gyèp yös yení' luyú ni'a qui yöl-la' yení' queè' gbaz la'y na'. ²Bè'è zidz didza' gbaz la'y na', gnè': "Chbguindj. Chbguindj Babilonia, yöd'z zxön na'. Chböac xlatj tu' xöhui' len xlatjgac bö' xöhui' tun ditj bunách. Tu'zoaba' ni' lidxcba' bguinn xtsni' len bguinn nacgac xöhui'. ³Cni guc qui yöd'z na' ni'a qui le glun bunách nacué' ni', glunè' ga glun bunách yúgu'tè yöd'z ca' nacgac le ta'zéz ládxi'què' le cunác. Glunlen lequè' le cunác nup ta'ná bè' yöd'zlyú, ati' guta' yöl-la' tsahui' quequè' bönni' ta'u tuti' nacu'è yöd'zlyú, le gyantsca le

záqui'tsqui gulazé'z ládxi'gac nup nacuá' ni'."

⁴Ni'r byönda' rui' didza' yetú nu zoa yehua' yubá, rna: "Gul-rúj lu yöd'z na', lbi'ili' náquili' quia' neda', cui gunli' tsaxxón len lequè' dul-la' len cui gac queëli' tsaxxón len lequè' zxguia'. ⁵Nayantsca dul-la' nabága'què', chnayás nadxíncz luzxbá, san Dios rajneynè' le cunác nunquè'. ⁶Gul-bí'i quequè' ca na' glunè' queëli'. Gul-bí'i quequè' chop cò' tsca le glunè'. Gul-bí'i quequè' chop cò' tsca le nac xöhui' glunè' queëli'. ⁷Gul-gún ga la'zaca' la'gui'è len la'bódx yechè'è tsca yöl-la' ba len yöl-la' zxön glui' cuinquè'. Ta'zá' ládxi'què', ta'né': 'Rö'tu' ni, rna bë'tu'. Cutu nactu' uzéb len gatga cödx yéchi'tu'. ⁸Qui lè ni na', tu dzatèz la'dxín quequè' le la'zaca' la'gui'è, yöl-la' gut, len yöl-la' rbódx yechi' len yöl-la' rdun. Leguiè' lu gui', le napczè' yöl-la' huac zxön Xanru' Dios, Nu rusyúdx quequè'.

⁹La'bódx nup ta'ná bë' yödzlyú len glun tsaxxón len lequè' le cunác, len guluzí' xbey le naqui quequè', ati' la'bódx yechè'è cati' la'lé'inè' dzön qui yöd'z na' regui. ¹⁰Zi'tu' zi'tu'z la'cu'è le ládxi'nè' ca gac zxguia' gac qui yöd'z na', la'né': Bica' bayechi' Babilonia, yöd'z zxön ni, guctèr blau. Tu dzatèz gac zxguia' qui.

¹¹La'bódxè' ca' bönni' ta'u tuti' nacu'è yödzlyú len la'bódx yechè'è qui yöd'z na' le cutur soa ni' nu ga'u bi lúti'è. ¹²Nutur nu ga'u ni' le náquicni oro len plata, len yugu' guiöj zaca', len yugu' bga, len yugu' lari' záqui'tsqui, len lari' xna, len lari' dxí'adau', len lari' xna

gui'z, len yugu' yag rla' zxix, len le náquicni dxit záqui'tsqui, len le náquicni yag záqui'tsqui, len le náquicni cobre, len le náquicni guia, len le náquicni guiöj jar. ¹³Nutur nu ga'u ni' canel, len yugu' le rla' zxix, len yal, len le rla' zxix qui mirra len qui yöj olíbano, len xisi uva nal, len le nac za, len yözj dxí'adau', len zxoá' xtil, len yugu' búrrodau', len yugu' bö'cu' zxila', len yugu' böa', len yugu' carreta, len yugu' bönni' huen dxin, len yela'gac bunách. ¹⁴Lè lequè' nup na' ta'u tuti', la'ná: Naduagac le gzè ládxi'li'. Chgdöd quegac yöl-la' tsahui' len le nacgac lach queëli', ati' cutur gdzólili' leygac.

¹⁵La'bódxè' bönni' ta'u tuti' na', guta' quequè' yöl-la' tsahui' le glúti'è lu yöd'z na', ati' la'cu'è zi'tu' zi'tu'z le ládxi'nè' ca gac zxguia' gac qui yöd'z na', len la'bódx yechè'è, ¹⁶la'né': Bica' bayechi' yöd'z ni gac zxön. Guc ca ngul nácunu lari' záqui'tsqui len lari' xna, len lari' xna gui'z, len nazí' lguitj queënu le náquicni oro len le náquicni guiöj zaca' len yugu' bga. ¹⁷Tu dzatèz gnit yöl-la' tsahui' qui yöd'z ni.

'La'cu'è zi'tu' zi'tu'z yúgu'tè bönni' xan barco len nup nacuá' lé'igac barco na', len nup tu'sá' yugu' barco na', len nup tun dxin lu nis zxön, ¹⁸len cati' la'lé'inè' dzön qui yöd'z na' regui, la'bódxè', la'né': ¿Bizxal yöd'z gac zxön ca nac yöd'z ni?

¹⁹Ludxí'è' bëchtö icjqüè', len la'bódxè' len la'bódx yechè'è, la'né': Bica' bayechi' yöd'z ni gac zxön. Yöl-la' tsahui' qui yöd'z ni ben ga guta' yöl-la' tsahui' quegac yúgu'tè

nup nacgac xan barco lu nis zxön.
Tu dzatëz gnit yödzt ni.

²⁰Gul-dziji ca gac qui yödzt ni,
lbi'ili' zoali' yehua' yubá, lenca'
lbi'ili' náquili' queë' Dios, lbi'ili',
bönni' gbaz queë' len lbi'ili', bönni'
rui'li' didza' uláz queë'. Gul-dziji, le
chbchuguë' Dios qui yödzt ni ni'la
qui bi glun queëli' nup nacuá' lu
yödzt ni."

²¹Ni'r buchisë' tu guiöj zxön le
nac ca guich ryëtü, tuë' gbaz la'y
nal, ati' gru'në' lei lu nis zxön, gnë':
"La' cniz gac, gguindj Babilonia,
yödzt na' guc blau, ati' cutur nu
udzöli lei. ²²Cutur nu yöni lu yödzt
na' nup ta'guínn lë'i le rul-l, len
clëg nup tu'códx gui len clëg nup
tu'códx trompeta, len cutur udzöl
ni' bönni' huen dxin, len cutur yön
ni' bö rgu'u le rutu. ²³Cutur uzení'
lu yödzt na' nitü gui', len cutu yön
ni' chi'ë bönni' utság në'ë, len clëg
chi'ibi' bi'i ngul utság na'bi'. Cni
gac zal-la' nacli' blau, lbi'ili' rá'uli'
len rúti'li' lu yödzt ni, len gzxi' yé'ili'
bunách gdutë yödztlyú len yöl-la'
udzá' queëli'.

²⁴Lu yödzt ni blalj xchönquë'
bönni' glu'ë didza' uláz queë' Dios
len xchöngac nup náquigac queë'
Dios lenca' xchöngac yúgu'të
bunách yödztlyú, guludödi lequë'
nup nacuá' yödzt ni."

19 Gdöd lë ni byönda' tui' zidzj
didza' bunách zian nacuá'
yehua' yubá, ta'ná:

Yöl-la' ba Dios. Yöl-la' ruslá
runë',

Ati' yöl-la' zxön len yöl-la' uná bë'
Napë' Dios queëru'.

²Nac gdutë li len tsahui' ca
rusyudxë'.

Bchuguë' qui yödzt na' nac ca tu
ngul udá dzag,
Len quegac bunách lu yödzt na'
Glun ditj bunách yödztlyú len le
cunác glunë'.

Dios buzí' lë' lequë'

Le guludödcde' huen dxin queë'.

³Leyúbl gulané': "Yöl-la' ba Dios.
Cuentez dzön ga regui yödzt na'."

⁴Gulutság lauquë' lyu idáp uru'ë
bönni' gul ni' len idáp nup ni'
nabangac, ta'yj ládxi'quë' Dios,
rö'ë latj blau queë'. Gulané': "Ca'
gac. Yöl-la' ba Dios."

⁵Ni'r byönda' rui' didza' tu nu zoa
latj blau na', rna:

Gul-cu'ë Dios queëru' yöl-la' ba
Yúgu'tëli' runli' xchinë',
Lbi'ili' na' rádxi'li' Lë',
Nacli' bunách ca'z len bunách
blau.

**Lni qui yöl-la' rutság na' queë'
Bönni' naquë' Bö'cu' Zxíla'dau'**

⁶Byönda' ca' nu rui' zidzj didza',
byön ca ryön cati' tui' didza'
bunách zian, len byön ca' ca ryön
ga rdöd yegu zxön, o ca ryön cati'
rnë gziu', rna:

Yöl-la' ba Dios le rzu lahuë' rna
bë'ë,
Napczë' yöl-la' huac.

⁷Ral-la' udziji ládxi'ru' len uzi'ru'
xb'

Len cu'ru'-në' yöl-la' ba
Le chbdxin dza lni qui yöl-la'
rutság na'

Queë' Bönni' na' naquë' Bö'cu'
Zxíla'dau',
Si' lu në'ë Cristo nup náquigac
queë'.

Chzoa rbözbi' bi'i utság ná'lenbi'
Lë',

Nacbi' le ruluí' nup na' náquigac queé'.

⁸Dios ru'ë-bi' latj gácubi' lari' záqui'tsqui

Le nac gdu len ryëp yös yení'.
Lari' záqui'tsqui na' ruluí' le nac tsahui' nungac nup náquigac queé' Dios.

⁹Ni'r gudxë' neda' gbaz la'y na', gnë': "Bzuj lu guich didza' ni: Bica' bagac nup na' nulidzë' lequë' Dios quië la'cu'ë lni qui yöl-la' rutság na' queë' Bönni' naquë' Bö'cu' Zxíla'dau'."

Gudxë' ca' neda': "Yugu' didza' gdu'të li ni ru'ë didza' Dioscz."

¹⁰Buzechu zxiba' xni'ë gbaz la'y na' quië tsej ladxa'a lë', san gudxë' neda': "Cutu gunu' cni. Neda' ca' naca' huen dxin queë' Dios ca' nacu' li' len ca' nacque' böchi' lza'u nazí' lu na'quë' le nac gdu'të li ca' nac queë' Jesús. Gyij ladxë'ë Dios."

Nup tui' didza' uláz queë' Dios, tui' didza' le nac gdu'të li ca' nac queë' Jesús.

Bönni' dxië'-ba' böa' chguich

¹¹Ni'r blé'ida' nayálj luzxbá, ati' buluí' lauba' tuba' böa' chguich, ati' lë' Bönni' dxië'-ba', Nu Run Ca Rna, lenca' Nu Nac Le Nacz. Cni lë' le rbequi xbeynë' ca' nac le nac gdu'të li lenca' cni tsijë' lu gdil-l. ¹²Ryëp yös yení' yøj lahuë', nacgac ca' gui', len dxiagac icjë' bregui' zian. Nayúj lahuë' tu le lë', le nutú nu nözi, san tuzë' Lë' nöznë'. ¹³Nacuë' tu lari' ni'aj rön, len lë' ca' Nu Nac Xtidzë'ë Dios. ¹⁴Rajnauquë' Lë' ni'a në'ë guixz yu nacu'ë yehua' yubá, dxiacquë'-ba' böa' chguich len nácuquë' lari' záqui'tsqui, nac

chguichdau'z len cutu nac bösj.

¹⁵R-ruj ru'ë le nac ca' tu guia tuchi' gundë' zi' bunách yugu' yödz. Gna bé'inë' lequë' len xuyág guia len gunë' lequë' zxguia', gac quequë' ca' rac qui le rbia lba uva, zoa nu rulíb leygac, le rléytsquinë' Dios, napczë' yöl-la' uná bë'. ¹⁶Nayúj lu lari' nacuë' lenca' lu xgatsjë' ca lë', Nu Rna Be'i Nup Ta'ná Bë', lenca' Nu Nac Xangac Nup Nacgac Xan.

¹⁷Ni'r blé'ida'-në' zuinë' lu gbidz tuë' gbaz la'y, ati' bë'ë zidz didza', gudxë'-ba' böa' ta'zuba' luzxbá, rnë': "Gul-dá, gul-dúb ga ni gáguli' lni zxön queë' Dios. ¹⁸Gáguli' xpéla'gac nup ta'ná bë', len xpéla'gac nup nacu'ë lu na'gac bönni' rjaquë' gdil-l, len xpéla'gac nup nalgac, len xpéla'cba' böa', len xpéla'gac nup ta'bía lecba', len xpéla'gac yúgu'të bunách, nup cunadá'ugac len nup nadá'ugac, nup nacgac ca'z len nup nacgac blau'."

¹⁹Ni'r blé'ida'-ba' böa' snia' na' lenca' bönni' ta'ná bë'ë yödzlyú, len bönni' rjaquë' gdil-l guixz yu quequë', nudubquë' quië lúnlenë' gdil-l Bönni' dxië'-ba' böa' chguich, dzaggac Lë' ni'a në'ë guixz yu. ²⁰Bdzunba' böa' snia' na' lenca' bönni' na' bë'ë didza' uláz queëba', bönni' na' benë' yugu' le nac bë'tsca lauba', gzxi' yé'inë' nup ni' glui' latj nu uzúj láhuigac lë' na' nac bë' da'gac lëba' len gulayíj ládxi'gac bdau' queëba'. Böa' snia' na' lenca' bönni' na' bë'ë didza' uláz queëba', nabangacz ca' gularu'në' leygac ga rö' gui' zxön le réguilen lë' na' ruzégui'tsca. ²¹Yúgu'të nup na' gda'gac lequë' budödcdë' leygac len guia tuchi' na' r-ruj ru'ë Bönni'

na' dxièl'-ba' böa', ati' guluhuöljba' yúgu'tèba' böa' na' ta'zuba' luzxbá, gláguba' xpéla'què'.

Chi gayuá' iz

20 Gdöd lè ni blé'ida' ruhuötjé' gbaz la'y, zè'è yehua' yubá, zönè' xzi'n guia qui latj chul, ati' nu'è tu du guia yödx. ²Gzxönè'-ba' bël zxön xtsni' na', nacba' bël gzoaba' dza ni'tè, bël na' lèba' tu' xöhui' lenca' Satanás, ati' béguè'-ba', len buca'nèl'-ba' cni chi gayuá' iz. ³Yajchu'nèl'-ba' latj chul len buseyjé' latj na', bdè'è le quel-la' le ruséyj latj na' quiè cutur si' yé'iba' bunách yugu' yödz ga gza'ar chi gayuá' iz, ati' töd ni' ral-la' yedxba' tu chi'idau'.

⁴Ni'r blé'ida' latj gap ta'bó' nup ta'ná bè', ati' ta'bó' yugu' latj na' nup guladel-li' la'bequi xbey le rac. Blé'ida' ca' yugu' bö' glaccz bunách gulurixè' yengac bönni' cunacquè' tsahui' le glun lna' lau queè' Jesús len le glun lban qui xtidzè'è Dios. Yugu' bunách ni cutu gulayíj ládxi'gac böa' snia' na' len bdau' queèba', len cutu glui' latj nu uzúj ra' xgagac o lu na'gac lè na' nac bè' nu da' lèba'. Gulubán nup ni lu yöl-la' gut len gulaná bè'len Cristo chi gayuá' iz, ⁵san yezica' bunách natgac cutu gulubán. Cati' gza'ar chi gayuá' iz lubán. Yöl-la' rubán lu yöl-la' gut guc ni nac le rac zi'al. ⁶Bica' ba len bica' la'y nup ta'del-li' yöl-la' rubán na' rac zi'al. Yöl-la' gut le rac burópl lzu cutur bi gac gun quequè', san lacquè' bxuz queè' Dios lenca' queè' Cristo, ati' la'ná bé'lenè' Lè' chi gayuá' iz.

⁷Cati' gza'a chi gayuá' iz na', lusanè' Satanás ga na' nadzún.

⁸Urúj Satanás, tsajxí' ye'i bunách yugu' yödz nacuá' idáp la'la yödzlyú. Si' ye'i ca' bunách yödz Gog len Magog, utúb lequè' lu gdil-l. Tscanacgac nup ni, nacgac ca nac yuzx rö' ra' nis zxön. ⁹Guixz yuz guladödè' gdutè luyú, ati' gulacu'è li'ajl latj ga na' nacuá' bunách náquigac queè' Cristo, le nac yödz na' nadxi'inè' Dios. Ni'r benè' Dios ga böxj gui' bruj yehua' yubá, le buzegui' lequè'. ¹⁰Tu' xöhui' na' nazí' ye'i lequè', yajchu'nquè' lei ga rö' gui' zxön qui lè na' ruzégui'tsca, ga na' chzoaba' böa' snia' na' lenca' bönni' na' bèle didza' uláz queèba'. Ni' la'zaca' la'guí'i rël len tè dza yúgu'tè iz zi'a' za'c.

Ta'dxín bunách lahuè' Dios ga rö'è rbequi xbeynè'

¹¹Ni'r blé'ida' tu latj blau chguich, len blé'ida' ca' Nu rö' rbequi xbeynè' latj na'. Lahui lau Nu ni gulanittè yödzlyú len luzxbá, len cutur budzöl xlatjgac. ¹²Blé'ida' ca' nup chnatgac, nup nacgac blau len nup nacgac ca'z, zuicnè' lahuè' Dios. Gulayálj guich, len gyalj ca' yetú guich ga na' nayujgac lagac nup nadél-li'gac yöl-la' na'bán gdu. Glequi xbeynè' Dios nup na' chnatgac tsca nac le nayúj yugu' lu guich na', lè na' glun. ¹³Lu nis zxön gulurúj nup chnatgac, nacuá' lu nis zxön. Lu yöl-la' gut, len lu latj chul gulurúj nup chnatgac, gulacuá' gap ni', ati' glequi xbeynè' Dios tu tuè' tsca nac le glunè'. ¹⁴Ni'r yajtsazgac yöl-la' gut len latj chul ga ni' rö' gui' zxön le nac latj qui yöl-la' gut le rac burópl. ¹⁵Yajtsazgac latj ga na' rö' gui' zxön nup cunayujgac lu

guich quegac nup nadél-li'gac yöl-la' na'bán gdu.

Luzxbá cub len luyú cub

21 Gdöd na' blé'ida' tu luzxbá cub len tu luyú cub, le chgdöd quegac luzxbá na' len luyú na' gulacua' zi'al. Cutur bi dē nis zxon. ²Neda', Juan, blé'ida' yödz la'y na', nac Jerusalén cub, ruhuótj, r-ruj yehua' yubá ga zoë' Dios, chnabá'a qui ca nabá'a queëbi' bi'i ngul chzoa utság ná'lenbi' bönni'. ³Byönda' rui' didza' yehua' yubá nu rna: “Gul-yutsca'. Ga zoë' Dios zoalen bunách. Sóalenë' lequë', ati' lequë' lacquë' bunách queë'. Dioscz sóalenë' lequë', gaquë' Dios quequë'. ⁴Dios uzxië' nis rbödx zoa yöj lauquë'. Nutur nu gat, len nutur nu cödx, len nutur nu cödx yechi', len nutur nu saca' qui'i, le chgdöd quegac lē na' glac zi'al.”

⁵Ni'r Nu na' rō' latj blau ni' gna: “Byutsca'. Yúgu'tē ruína' cub.”

Gudx ca' neda': “Bzuj lu guich lē ni, le nac gdu'tē li didza' ni len nac löz.”

⁶Ni'r gudx neda': “Chnaccz. Neda' naca' Nu zoa zí'atēl lenca' Nu rajseytē ca nac le rzu lau len le ruúdxte. Nu rbidx nis, neda' guna' ga gui'j nis na' runn yöl-la' na'bán. ⁷Nup luxícj lu le rac yödzlyú, gac quegac yúgu'tē lē ni. Neda' gaca' Dios quequë', ati' lequë' lacquë' zxi'ncza', ⁸san nup tadxi len nup cutu ta'yējlē' neda', len nup nacgac xöhui', len nup tu'dödi bunách, len nup tun le cunác, len nup nacgac udzá', len nup ta'yíj ládxi'gac bdau' guiöj bdau' yag, len yúgu'tē nup ta'zì' yē', chzoa rböz xlatjgac lu

gui', ga ni' rō' gui' zxon qui lē na' ruzégui'tsca, lē na' nac yöl-la' gut rac burópl.”

Yödz Jerusalén le nac cub

⁹Ni'r bidë' ga zoa' tuë' gbaz la'y nababë' gadxë' gbaz la'y ni' gulazönë' gadx zxi'ga'dau' ni' yúdzugac gadx guidzhuë' yajséytégac. Gudxë' neda': “Gda ni. Neda' ului'ida' li' bi'i ngul ra'bán na' zi'a butság ná'lenbi' Bönni' na' naquë' Bö'cu' Zxíla'dau'.”

¹⁰Gdu gzóalenë' neda' Dios Bö' La'y, ati' bchë'ë neda' gbaz la'y na' tu lu gui'a sib, len bului'inë' neda' yödz la'y Jerusalén, ruhuótj, r-ruj yehua' yubá ga zoë' Dios. ¹¹Yödz ni ryëp yös yení' le zoalen lei yöl-la' yení' queë' Dios. Ryëp yös yení' ca ryëp yös yení' tu guiöj záqui'tsqui ca nac guiöj gui'dau'z nazí' lei jaspe. Yeni'dau' nac yödz na' ca nac guiöj jar. ¹²Gdu zbi'il yödz na' zoa tu zö'ö zxon len sib. Lē'i zö'ö na' nacuá' chinnu gap nu ryaz. Ra' gap nu ryaz na' nacu'ë chinnuë' gbaz la'y tun chi'ë. Tu tu ga nu ryaz na' nayúj tu tu lagac idxinnu cö' di'a dza zxi'n xsoë' Israel. ¹³Lē'i zö'ö ruyú zaca' ga rlen gbidz nacuá' tsonn gap nu ryaz, len zaca' ga za' bö' ziaq nacuá' tsonn gap nu ryaz, len zaca' tsła'a ga rdöd gbidz beo' ziaq nacuá' tsonn gap nu ryaz, len zaca' ga rbia gbidz nacuá' ca' tsonn gap nu ryaz. ¹⁴Zxan zö'ö qui yödz na' nacuá' chinnu xlibi zö'ö, ati' lé'igac xlibi zö'ö na' nayujgac laquë' idxínnutë' bönni' gbaz queë' Bönni' na' naquë' Bö'cu' Zxíla'dau'.

¹⁵Zönë' tu yag urixi náquini oro gbaz la'y na' ruí'lenë' neda' didza',

quié grixè' tsca nac yöd'z na', len tsca nacgac gap nu ryz, len tsca nac zö'ö qui. ¹⁶Yöd'z na', leydi'i nacgac idáp la'a. Leydi'i nac yöl-la' tunn qui len yöl-la' blaga' qui. Len yag na' brixè' tsca nac yöd'z na', nac gdu tsca gac nu sa' gdu chinnu dza, ati' leydi'i nac yöl-la' tunn qui, len yöl-la' xtasa' qui, len yöl-la' blaga' qui. ¹⁷Brixè' ca' yöl-la' yöd'x qui zö'ö na', nac tu gayuá' yu tapún dxit, tsca nac tsadxít qui na' bunách, lè na' r-rixnè' gbaz la'y na'.

¹⁸Náquini guiöj jaspe zö'ö na', ati' yöd'z na', órotèz náquini, le nac yeni'dau' ca nac guiöj jar. ¹⁹Xlibi zö'ö qui yöd'z na' nazi'gac lguítj guiöj záqui'tsquisag.

Xlibi zö'ö zi'al náquini guiöj jaspe.

Le buróp náquini guiöj zafiro.

Le bunn náquini guiöj ágata.

Le budáp náquini guiöj esmeralda.

²⁰Le bugayu' náquini guiöj ónice.

Le buzóp náquini guiöj cornalina.

Le bugádx náquini guiöj crisólito.

Le buzunu' náquini guiöj berilo.

Le bugá náquini guiöj topacio.

Le budxí náquini guiöj crisoprasa.

Le idxinéaj náquini guiöj jacinto.

Le idxinnu náquini guiöj amatista.

²¹Chinnu gap nu ryz na' ta'yeyjni chinnu bga. Tu tu ga nu ryz na' ryeyjni tuz bga. Luyú la' nöz blau qui yöd'z na', órotèz náquini, yeni'dau' nac ca nac guiöj jar.

²²Nitú gdu' blé'ida' lu yöd'z na', le naquè' gdu' qui Xanru' Dios,

napczè' golutè yöl-la' uná bè', len lèzca' cni naquè' Bönni' naquè' Bö'cu' Zxíla'dau', naquè' gdu' qui yöd'z na'. ²³Cutu run bayúdx tseni'gac lu yöd'z na' gbidz len beo', le uzení' yöl-la' yení' queè' Dios lu yöd'z na', ati' naquè' ca' le uzení' ni' Bönni' naquè' Bö'cu' Zxíla'dau'. ²⁴La'dá lu yení' qui yöd'z na' bunách yugu' yöd'z, nup nulagac, ati' djua'què' ni' yöl-la' tsahui' quequè' bönni' ta'ná bè'è yöd'zlyú. ²⁵Gatga tseyjgac gap nu ryz lu yöd'z na' lahui' dza, ati' latj na' gatga gac rël. ²⁶Djua'gac ni' le nacgac lsaca' len yöl-la' tsahui' quegac bunách yugu' yöd'z. ²⁷Cutu ca' tsaz ni' nitú le cunác gdu, len nitú le nac xöhui', len nitú nu rzi' yè', san tsazgac ni' nupz nayujgac lagac lu guich queè' Bönni' naquè' Bö'cu' Zxíla'dau', ga na' nayujgac lagac nup nadél-li'gac yöl-la' na'bán.

22 Ni'r bului'inè' neda' tu yegu yeni'dau' gbaz la'y na', le nac nis yegu runn yöl-la' na'bán. Ryèp yös yení' yegu na' ca ryèp yös yení' guiöj jar. R-ruj yegu na' lu latj blau ga rö'è Dios len ga rö'è ca' Bönni' naquè' Bö'cu' Zxíla'dau'. ²Rza' yegu ni gatsj lahui'l nöz blau qui yöd'z na'. Tsla'a hueaj ra' yegu na' zoa tu yag runn yöl-la' na'bán, ati' ta'bía chinnu lzu tu iz. Tu tu beo' ta'bía yag na'. Nacgac le tu'ún bunách yugu' yöd'z xlágui'gac yag na'. ³Cutu soa ni' nitú le dxia dö'. Soa lu yöd'z na' latj blau ga rö'è Dios lenca' ga rö'è Bönni' naquè' Bö'cu' Zxíla'dau', ati' la'yj ládxi'què' Lè' huen dxin queè'. ⁴La'lé'inè' lahuè' Lè', ati' lè' nayúj ra' xgaquè'. ⁵Cutu gac ni' rël, ati'

cutu la'quínn tu le cu'u yení' len clëg yení' qui gbidz nup nacuá' ni', le gaquë' Xanru' Dios yení' quequë'. Tsalzú la'ná bë'tecz nup nacuá' ni'.

Chzoa huödë' Cristo

⁶Ni'r gudxë' neda' gbaz la'y na', gnë': "Didza' ni nac gdotë li len nac löz. Xanru' Dios, Nu ruchíz Bö' La'y icj lãdxi'dau'que' bönni' tu'ë didza' uláz queë', chbsölë'ë gbaz la'y queë' quië ului'inë' yugu' huen dxin queë' le ral-la' gactë." ⁷Cni rnë' Jesucristo: "Chzoa huöda'. Bica' ba nu run ca rna didza' ru'a uláz queë' Dios, nayúj lu guich ni."

⁸Neda', Juan, byönda' len blé'ida' yugu' lë ni. Gdöd byönda' len blé'ida' yugu' lë ni, buzechu zxiba' xni'ë gbaz la'y na' bului'inë' neda' yugu' lë ni quië guna' lë' zxon. ⁹Ni'r lë' gudxë' neda': "Cutu gunu' cni, le naca' neda' huen dxin queë' Dios ca nacu' li', len ca nacquë' böchi' lza'u na' tu'ë didza' uláz queë' Dios, lenca' ca nacgac yúgu'të nup tun ca rna le nayúj lu guich ni. Ben zxon Dios."

¹⁰Gudxë' ca' neda': "Cutu ca' ucachu'u xtidzë'ë Dios ni, didza' ru'a uláz queë' len nayúj lu guich ni, le chzoa lac lë ni. ¹¹Nu rua' dö' gua'tecz dö'. Nu run le cunác guntecz le cunác. Nu run dxi'a, guntecz dxi'a, ati' nu naquí quizi queë' Dios, gáquitecz quizi queë'." ¹²Rnë' Jesús: "Chzoa huöda'. Nu'a lu na'a le nadél-li'gac bunách, ubi'a qui queëquë' tsca nac bi glunë'. ¹³Neda' naca' Nu zoa zí'atël lenca' Nu rajseytë, ca nac le rzu lau len le ruúdx'të. Naca' ca' Nu run ga su lau len Nu rusyúdx.

¹⁴Bica' ba nup nayár le nácugac, tun le nac dxi'a. Nazi'quë' latj lahuë' le rbia yag runn yöl-la' na'bán len gac la'yazië' gap nu ryaz lu yödza na'. ¹⁵La'cuá' ni'l ra' yödza na' nup nacgac xöhui', len nup nacgac udzá', len nup tun le cunác, len nup tu'dödí bunách, len nup ta'yíj lãdxi'gac bdau' guiöj bdau' yag, len nup ta'dzág lãdxi'gac ta'zí' yë'. ¹⁶Neda', Jesús, bsöla'a gbaz la'y quia', bului'inë' lbi'ili' yugu' lë ni, lbi'ili' na' dzagli' yugu' cö' bunách quia'. Neda' naca' di'a dza queë' David lenca' zxi'n xsoë'. Naca' ca' bölj usíl."

¹⁷Tu'ë didza' Dios Bö' La'y len bi'i ngul utság ná'lenbi'-në' Bönni' naquë' Bö'cu' Zxíla'dau', ta'né': "Gda."

Nu ryöni didza' ni ral-la' gna: "Gda."

Nu rbidx nis len nu rzë lãdxi' lej, ral-la' guid len gui'j nis runn yöl-la' na'bán.

¹⁸Neda', Juan, ruzéjni'da' nup ta'yöni didza' ni ru'a uláz queë' Dios len nayúj lu guich ni, rnia': Chqui' nu udá' lë'i didza' ni, Dios ubi'ë qui nu na', gunë' lë' zxguia' ca nac le nayujgac lu guich ni. ¹⁹Lëzca' cni, chqui' nu cua bíti'tëz didza' ni ru'a uláz queë' Dios len nayúj lu guich ni, Dios ugüë' ca' xlatj nu na' lu guich ga nayujgac lagac nup nadél-li'gac yöl-la' na'bán gdu, lenca' lu yödza la'y, ca na' nayúj quequë' lu guich ni.

²⁰Xanru', Nu run lna' lau quegac lë ni rnë': "Ja. Huödtea'."

Ca' gac. Gda, Xantu' Jesús.

²¹Rnabda'-në' Xanru' Jesucristo uzá' lãdxë'ë queëli' yúgu'tëli'. Ca' gac.